

C40-4514



大樹緊那羅王所問經卷第一  
姚秦三藏法師鳩摩羅什譯  
如是我聞一時佛住王舍城者閻崛與大比丘衆六萬二千人俱菩薩摩訶薩七萬二千衆所知識皆從十方世界來集得陀羅尼無礙辯才進入念慧慚愧具足其志堅固猶如金剛善修成就一切佛法志意精誠成就具足自不忘失菩提之心亦能令他而不忘失善調柔軟攝伏諸根善能知捨所愛之物以清淨戒善自莊嚴於諸衆生其心平等以柔和忍力而自莊嚴於無量那由他阿僧祇劫勤修進力於諸

C40  
4514  
51

B 64853



1 2 3 4 5 6 7 8 9 20 1 2 3 4 5 6 7 8 9 20 1 2 3 4 5 6 7 8 9 20

禪定解脫三昧遊戲神通自在無礙善以智慧分別一切諸法句義其心不動如大山王於諸衆生其心平等如地水火風善離愛恚常行慈心恒遣慈光徧照衆生安住大悲常勤觀察一切衆生住於大喜樂法真足住於大捨得無二智利衰毀譽稱譏苦樂皆已超過如是世法慧光善伏自衆他衆降伏衆魔世所難遇如優曇華爲諸衆生中大師子吼究竟涅槃怖樂甚深四無所畏爲如來印之所印之所記無錯如說而行於深法藏義味相應蔽諸日月名稱流聞徧十方界悉爲諸佛之所護持守護法藏常不斷絕

三寶種性善能遊過無邊佛刹善解了知隨宜給侍諸佛世尊聽聞受法常勤精進教化衆生得到方便智慧彼岸善隨一切諸衆生根如應說法善知一切諸衆生等意行之相其心淨妙善巧言說爲大醫王善療衆病已於無量阿僧祇佛所種諸善根善集相好福德莊嚴善能解了空無相願善解諸法如幻如焰如水中月如夢鏡像解一切法如虛空相善能解了一切衆生音聲言說善分別法樂說無盡善能觀眼法眼佛眼善度莊嚴助道法分善解超度一切諸

1 2 3 4 5 6 7 8 9 20 1 2 3 4 5 6 7 8 9 20

道明了菩薩法藏所攝善能轉於不退法輪得三昧  
印相善能知到金剛場三昧一切諸法自在三昧常  
現在前持大寶炬其心謙下於諸衆生常觀一切諸  
衆生心亦常觀諸衆生智慧近佛智慧令諸衆生施  
作佛事所作事辦皆已聚集一切功德盡未來劫說  
其功德不可窮盡其名曰寶住菩薩寶有菩薩寶手  
菩薩寶華菩薩寶相菩薩喜見菩薩愛意菩薩愛眼  
見菩薩持地菩薩作喜菩薩大勢菩薩大德菩薩降  
魔菩薩摩竭提菩薩濡天菩薩曼陀羅香菩薩寶喜  
菩薩等觀菩薩無高下菩薩善御菩薩一切衆生不

請友菩薩彌勒菩薩雲音菩薩持山嚴菩薩上積菩  
薩上友菩薩勇友菩薩光相菩薩光德菩薩燈王菩  
薩觀志菩薩光莊嚴菩薩雜綵冠菩薩天冠菩薩天  
王菩薩天眼觀菩薩觀世音菩薩善臂菩薩善思志  
菩薩善住志菩薩善住業菩薩不動足進菩薩金剛  
足進菩薩越三界足菩薩疾辯菩薩速辯菩薩無斷  
辯菩薩無住辯菩薩妙音菩薩梵音菩薩喜一切衆  
生音菩薩文殊師利法王子菩薩如是等上首七萬  
二千人於此三千大千世界釋梵護世并餘大威德  
諸天龍夜叉乾闥婆迦樓羅緊那羅摩睺羅伽人非

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

人等比丘比丘尼優婆塞優婆夷皆來集會爲欲聽  
法爾時世尊與無量百千大衆恭敬圍遶而演說法  
爾時天冠菩薩卽從座起整於衣服偏袒右肩右膝  
著地合掌向佛以偈讚曰

超世爲世作燈明	智慧利益於世間
令結闇者得光明	我今稽首離世間
十力行施最殊勝	善自調心到彼岸
天人龍神所供養	稽首敬禮燒結仁
勝相多利益世間	金色圓光普周徧
持淨妙戒大美音	稽首三界最無比

度諸衆生到彼岸	調伏諸論無能動
善了知諸衆生心	稽首敬禮勝大悲
斷諸結使不生著	以力降怨善住戒
天中之天淨結垢	我稽首禮降諸怨
衆寶中最無垢穢	常樂智慧爲先首
除斷貪瞋愚癡垢	稽首心等如虛空
演說四諦度四流	說甘露法施淨眼
遊行三界爲利衆	我稽首禮持輪相
常爲人天所供養	常化衆生令度脫
虛空人天所供養	我稽首禮人中勝

1 2 3 4 5 6 7 8 9 20 1 2 3 4 5 6 7 8 9 20

常樂集於正善法

常以慈心等世間

人尊調御住正道

稽首攝持一切德

淨音所說勝美妙

適意柔軟梵音聲

善解衆音到彼岸

稽首美妙如實說

趣空無相及無作

能取甚深難見法

善能進趣入解脫

稽首善知解脫道

世尊善解知因緣

常能斷離二邊見

實說因緣業果報

我稽首離諸見聞

無有來者及去者

無慢善能觀諸法

如幻如焰水月像

稽首敬禮善法眼

生若無生都無生

若生及滅亦無滅

其所止處如法住

調御善住如是處

有所言說便真實

善住如如叵傾動

金剛山身無動搖

我稽首禮叵傾動

其身口意等無異

名聞無量徧三界

我今欲問勝丈夫

願尊勿慮爲演說

爾時天冠菩薩偈讚佛已白言世尊今我於如來應

供正徧覺勝妙法中少有所問若佛聽許乃敢諮詢

爾時佛告天冠菩薩善男子恣汝所問隨汝所疑如

來當說悅可汝心爾時天冠菩薩白言世尊云何菩

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

薩得成雜種莊嚴之辯世尊云何菩薩得增勝智善  
 知分別甚深之法世尊云何菩薩善知諸根世尊云  
 何菩薩善能解知如應說法世尊云何菩薩善知一  
 切衆生心行世尊云何菩薩知一切因行果報亦知  
 出過所行無矣世尊云何菩薩莊嚴布施世尊云何  
 菩薩莊嚴戒忍精進禪智世尊云何菩薩善能解知  
 莊嚴梵道世尊云何菩薩不失神通世尊云何菩薩  
 斷諸結使世尊云何菩薩度到彼岸世尊云何菩薩  
 能現一切聲聞緣覺及諸衆生形色威儀無有別異  
 世尊云何菩薩觀於生死不住涅槃世尊云何菩薩  
 觀衆生界不動法界世尊云何菩薩不退失利觀現  
 失利世尊云何菩薩有大財寶封邑無盡以方便力  
 現爲貧窮世尊云何菩薩行於諸行令有作門入無  
 作門世尊云何菩薩善觀諸法世尊云何菩薩決定  
 分別一切諸法世尊云何菩薩行諸世法不爲所汙  
 世尊云何菩薩於法自在不觀望他世尊云何菩薩  
 不離見佛世尊云何菩薩善自調伏無諸惡法世尊  
 云何菩薩善爲師導而不吝法世尊云何菩薩爲諸  
 衆生作實依止世尊云何菩薩能轉一切諸佛法輪  
 世尊云何菩薩於一切法得灌頂位爾時世尊讚大

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

冠菩薩善哉善哉善男子汝今所問多所利益安樂世間利安人天攝取未來諸菩薩等善男子汝常曾於恒河沙等佛世尊所諮詢問難今復當大利益安樂未來菩薩令此大乘得久住世善男子汝之所問善心諦聽吾當演說天冠菩薩白言世尊受教而聽善男子菩薩成就四法得於雜種莊嚴之辯何等爲四是菩薩於一切衆生無侵害心捨諸一切所愛之物心無悔吝有說法者不斷其說起隨喜心歡喜踊躍讚言善哉勸請說法若於晝夜若在僧中若在佛塔以菩提心常爲先導起志欲心喜樂諸法而是菩

薩專心志欲以法等施不期利養善男子是爲菩薩成就四法得成雜種莊嚴之辯善男子菩薩成就四法得增勝智善知分別甚深之法何等四法順因緣法知我實性知入一切衆生實性知生死行無有來者無有去者知一切法虛空印相是爲四善男子菩薩成就四法善調諸根何等四法善知法界門觀諸法門無有障礙知諸神通善調伏心無有二行是爲四善男子菩薩成就四法善能解知如應說法何等四辯智度衆生智分別法智自淨其心亦淨一切衆生之心是爲四善男子菩薩成就四法善知一切衆

1 2 3 4 5 6 7 8 9 200 1 2 3 4 5 6 7 8 9 200

200

生心行何等四智慧超出智無有礙入於方便諸有所作終不中悔能自覺了是爲四善男子菩薩成就四法善知造因所得業報亦知出過所行無失何等四不說斷滅亦不說常因於業報如實而知如法而現法法示相是中無我無我所知於所作不失果報是爲四善男子菩薩成就四法莊嚴布施何等四莊嚴相莊嚴於好無比喻色無盡封邑及以寶手是爲四善男子菩薩成就四法莊嚴持戒何等四作轉輪王而善莊嚴菩提之心作釋提桓因而善莊嚴菩提之心作大梵王而善莊嚴菩提之心不墮惡道生人

天善處而善莊嚴菩提之心是爲四善男子菩薩成就四法莊嚴忍辱何等四出梵音聲迦陵頻伽聲多人所愛心意悅樂堅修善法得金色膚是爲四善男子菩薩成就四法莊嚴精進得不可壞何等四得一切衆生無能壞者爲諸衆生作不請友有所爲作專志不懈心無疲厭樂集多聞堅智莊嚴無厭是爲四善男子菩薩成就四法莊嚴於禪何等四無諸閻亂無有放逸無有躉脣不捨調伏心是爲四善男子菩薩成就四法莊嚴智慧何等四不說我人衆生壽命得無礙辯善能分別一切句義於一切法無有疑惑

1 2 3 4 5 6 7 8 9 20 1 2 3 4 5 6 7 8 9 20

20

是爲四善男子菩薩成就四法莊嚴梵道何等四在空淨處生起慈心爲化衆生起於悲心守護正法起於喜心生如來智起於捨心是爲四善男子菩薩成就四法不失神通何等四入於四禪而不退失入四空定知於方便心得自在知一切法神通遊至無量佛刹是爲四善男子菩薩成就四法斷諸結使何等四內自寂靜亦寂靜外善觀諸法知如幻化有大智力非橋慢力是爲四善男子菩薩成就四法度到彼岸何等四知於欲流不證離欲知於有流隨意往生知於見流不捨諸見知無明流不逆緣法是爲四善

男子菩薩成就四法能現一切聲聞緣覺及諸衆生形色威儀無有別異何等四善起如幻三昧如實而知一切法相善觀五通自觀已身知如幻化是爲四善男子菩薩成就四法觀於生死不住涅槃何等四諸佛護持自大悲心善巧方便不捨本願是爲四善男子菩薩成就四法觀衆生界不動法界何等四觀自實性解於法性觀衆生性不疑智性觀諸衆生同涅槃性是爲四善男子菩薩成就四法不退失利觀現失利何等四以專志心趣向涅槃修入生死專志欲於一切佛法現爲聲聞緣覺調伏是爲四善男子

1 2 3 4 5 6 7 8 9 2001 2 3 4 5 6 7 8 9 2012 3 4 5 6 7 8 9 2020

菩薩成就四法有大財寶封邑無盡以方便力現爲貧窮無諸財賄何等四或現作於轉輪大王釋梵天王爲化尊勝諸衆生故現作貧窮爲化貧窮諸衆生故見來求者盡捨一切所有財物見大富者現無盡寶有自在力是爲四善男子菩薩成就四法令有作門入無作門何等四說一切行無常淨於智行苦得於覺知一切行無我離於諸見涅槃法寂得勝智進行是爲四善男子菩薩成就四法善觀察諸法何等四善淨慧眼得明法眼佛眼現前於一切法得灌頂位是爲四善男子菩薩成就四法決定分別一切諸

法何等四辯智無滯解了諦智毘四依智不捨陀羅尼智是爲四善男子菩薩成就四法行於世法不爲所汙何等四觀知世法超出過於世間衆生斷除愛恚無所染汙畢竟明淨是爲四善男子菩薩成就四法於法自在不觀望他何等四定得自在智得自在慧得自在方便得自在是爲四善男子菩薩成就四法不離見佛何等四自往見佛亦勸衆生自往聽法亦勸衆生自發菩提心亦勸衆生發菩提心常不捨離念佛三昧是爲四善男子菩薩成就四法善自調伏無諸惡法何等四出世聖慧觀察知見顯示解脫

1 2 3 4 5 6 7 8 9 2001 2 3 4 5 6 7 8 9 2012 3 4 5 6 7 8 9 2020

善集法忍斷離一切不善法習是爲四善男子菩薩成就四法善爲師導而不吝法何等四專心利益一切衆生志意堅固無所慊恨常行教化一切衆生自捨已樂修集智慧常爲一切衆生作利成於已利是爲四善男子菩薩成就四法爲諸衆生作實依止何等四捨於已利常求利他自捨諸樂爲諸衆生求於法樂如所聞法爲人廣說無有疲倦以法養命不以衣食是爲四善男子菩薩成就四法能轉一切諸佛法輪何等四得陀羅尼得無斷辯智入一切衆生心行不觀種姓而爲說法引入涅槃是爲四善男子菩

薩成就四法於一切法得灌頂位何等四出過諸行住菩薩行得無生法忍示現生死爲不退轉印之所印入如來印住第十地善知諸地是爲菩薩成就四法於一切法得灌頂位佛說如是諸四法時三千大千世界六種震動大光普照於上空中百千億天作天妓樂歌詠讚歎天曼陀羅華作是歎言如來世尊無量阿僧祇劫所集無上正真道法皆悉於是諸四法中開示顯說若有衆生得聞是經受持讀誦兼復書寫於大衆中廣分別說當知是人不從小功德來若有衆生聞於如是諸四句法聞已信解受持讀

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

誦在大衆中廣爲人說不離菩提心彼人不久當於人天諸大衆中大師子吼如今如來大師子吼我等今者快得善利得聞如是諸四句法復能信解演說如是諸四法時八萬四千人天發阿耨多羅三藐三菩提心萬二千菩薩得無生法忍爾時天冠菩薩白言世尊菩薩成就幾法佛涅槃後得聞是經受持讀誦兼復書寫於大衆中廣說顯示佛告天冠菩薩善男子菩薩成就入法佛涅槃後受持讀誦書寫此經於大衆中廣分別說何等八志意成就專向菩提究竟行慈於諸衆生無侵害心住於大悲化諸衆生常

求法利樂法欲法求法集法心無滿足如海吞流放捨身命守護正法厚種善根集諸福德發起大願諸佛護持降諸魔怨離大衆畏天冠是爲菩薩成就八法佛涅槃後能得受持讀誦書寫如是經法在大衆中廣爲人說當於演說如是法時於此三千大千世界復六種震動坑坎堆阜諸山汙穢江河池流及諸大海皆不復現亦不惱觸水性衆生爾時三千大千世界悉平如掌微妙莊嚴於此三千大千世界百歲枯樹皆生華葉傾向於佛諸生林樹華葉果茂亦復向佛此大地上生諸蓮華大如車輪雜色可愛妙香

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

適意大光普照徧此三千大千世界上虛空中有諸天子不現其形鼓衆妓樂聞是樂音雪山王中香山王中所有諸天倍出妙香令此三千大千世界普悉大香時雪山王香山王中雨衆妙華皆流趣佛徧滿三千大千世界其餘諸樹亦悉雨華於上空中有一寶蓋覆萬由旬是大寶蓋垂諸真珠貫鈴綱莊嚴諸鈴綱中所出音聲柔軟悅意有大妙音徧聞三千大千世界爾時大德舍利弗見是變現合掌向佛白言世尊是何光瑞有是希有未曾之相普此三千大千世界皆悉莊嚴甚可愛樂佛告舍利弗是大樹緊那

羅王從香山中與無量緊那羅無量乾闥婆無量諸天無量摩睺羅伽大眾圍繞欲來見佛禮拜供養是大樹緊那羅王欲來見佛先現是相語言未久大樹緊那羅王與無量緊那羅衆無量乾闥婆衆無量天衆無量摩睺羅伽衆大眾圍遶作八萬四千妓樂以淨妙歌善和衆樂復有無量百千衆生皆悉隨從菩薩神通大力所持上昇虛空普雨衆華來詣佛所到已及諸侍從頂禮佛足右達七巾住世尊前爾時大樹緊那羅王以已所彈瑠璃之琴闇浮檀金華葉莊嚴善淨業報之所造作在如來前善自調琴及餘八

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

卷一

大藏經 卷一

五  
四

萬四千妓樂是大樹緊那羅王當彈此琴鼓衆樂時其音普皆聞此三千大千世界是琴音聲及妙歌聲隱蔽欲界諸天音樂爾時欲界所有諸天皆捨音樂來詣佛所是大樹緊那羅王當鼓琴時三千大千世界所有叢林諸山謂須彌山王雪山目真隣陀山摩訶目真隣陀山黑山及衆藥草樹木叢林悉皆涌沒涌漸徧涌等徧涌動漸徧動等徧動振漸徧振等徧振猶如有人極爲醉酒前卻顛倒不能自持諸山須彌峴峨涌沒亦復如是大樹緊那羅王當鼓琴時佛大衆中人王衆等比丘比丘尼優婆塞優婆夷天龍

夜叉乾闥婆阿修羅迦樓羅緊那羅摩睺羅伽釋梵護世若人非人及離欲者唯除菩薩不退轉者其餘一切諸大衆等聞是琴聲及諸樂音各不自安從座起舞時諸一切聲聞大衆聞琴樂音不能堪耐各從座起放捨威儀猶如逸樂小兒舞戲不能自持爾時天冠菩薩語是一切諸大聲聞大迦葉等汝諸大德已離煩惱得八解脫見四聖諦云何今者各捨威儀如彼小兒舉身動舞於時大德諸聲聞等答言善男子我於是中不得自在何以故由是琴音我等各各不安樂坐其身動舞不能自持所有心念不能令住

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

爾時天冠菩薩語大德迦葉汝何耆年少欲知足修行頭陀常樂空靜天人阿修羅敬汝如塔大德云何不能持身猶小兒舞云何不護是大衆心大迦葉言善男子如旋嵐大風吹諸樹木藥草叢林彼無有力能自安持非彼本心之所欲樂然復鼓動不能自持善男子今此大樹緊那羅王鼓作琴樂妙歌和順諸簫笛音鼓動我心如旋嵐風吹諸樹身不能自持是善丈夫誓願威勢福德神力於諸聲聞及諸緣覺所有威德彼爲殊勝爾時天冠菩薩語大迦葉汝今觀是不退菩薩威德勢力彼琴樂音不能令其動搖驚所持故諸琴樂音說是偈言

揚大德迦葉誰聞如是而當不發無上正真菩提道心何以故今有量智所有威力不如琴聲令如是等大威德人聞是琴聲不能自持其向大乘不退轉者不能令動爾時大樹緊那羅王更易調琴并及八萬四千餘樂佛威神力及大樹緊那羅王宿善根力之所持故諸琴樂音說是偈言

一切諸法向寂靜      如是乃至上中下  
空淨寂滅無惱益      無垢最上今顯現  
諸衆生等無衆生      過去現在亦復爾  
以音聲說令衆聞      是聲同等如法界

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

203

卷一

大藏經三月門總卷一

三

五四

諸世界同無世界

說示猶如虛空相

無生無增亦無減

顯示虛妄如虛空

善覺諸佛悉同等

法界決定無毀壞

解達施戒及智慧

一相平等同無相

諸結寂滅永無結

妄想於彼生分別

無內無外亦無中

從於妄想顛倒有

若法非法無妄想

推求諸法無所有

覺了名色如實性

彼行於世無染著

過去未來無邊量

所演說法亦如是

本際寂滅無盡滅

無有方所無住處

以文字故說是法

而此文字是盡相

知是文字盡相已

於一切法無妄想

持心等持無所持

彼此不違於法相

心及數法無有生

知一切法入平等

際無斷無所斷

前後及中同叵得

了知三世平等已

彼智無邊無有量

世間貪著於名色

有邊無邊皆寂靜

了知因緣法相已

無我衆生命妄想

所起我見永無起

一切諸法亦無起

若所起者本無起

彼常隨順順法忍

卷一

大藏經三月門總卷一

三

五四

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

其性猶如雲中電 一切法如我實性

我人衆生性自空 入此陀羅尼印相

隨所覺知三脫門 一相無相等同相

一切有法無邊量 法法自無有妄想

以文字說分別法 若上若中及與下

文字亦無有妄想 推求分別真實義

義及文字共相應 以音聲說無二義

若知本性常寂靜 彼本際性常自斷

若本性際常自斷 爲利世故修諸行

推求本際無本際 彼大慈悲最清淨

若大慈悲最清淨 苦樂同等而修行

亦復無高亦無下 彼名知利大丈夫

法眼寂靜最寂靜 若見不見常寂靜

亦復無增亦無減 彼性離作常寂靜

如空中聲叵捉持 雖可聞知不可說

是演說者及聽者 悉皆不實得自在

當諸琴樂演出是偈法音之時八千菩薩得無生忍爾時天冠菩薩白佛言世尊如是妙偈從何而出佛言善男子汝今自問大樹緊那羅王彼當答汝爾時天冠菩薩問於大樹緊那羅王緊那羅王如是妙偈

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

從何而出答言善男子從諸衆生音聲中出又問諸衆生音聲從何而出答言善男子衆生音聲從虛空出天冠問言緊那羅王衆生音聲非口出耶答言善男子是衆生音爲從身出爲從心出天冠答言不從身出亦不從心出何以故身癡無知如草木瓦石心無形色不可覩見無有觸礙不可宣說猶如幻化大樹緊那羅言善男子若離身心從何而出天冠答言從於思惟出生音聲又問若無虛空聲何由出天冠答言若離虛空聲終不出緊那羅言善男子是故當知一切音聲從虛空出當知是聲卽虛空性聞已便

滅若其滅已同空性住是故諸法若說不說同虛空性是故應當不捨空際如音聲分諸法亦爾若以音聲有所說法而是諸法於音聲中求不可得音聲於法求亦叵得善男子是故說言一切諸法不可言說但以音聲名爲言說當知言說爲無所說又以音聲名爲言說然是音聲本無住處若無住處則無堅實則名爲實若其是實則不可壞若不可壞則無有起若無有起則無有滅是名清淨若是清淨則是白淨若是白淨則無垢若是無垢則是光明若是光明則是心性若是心性則是出過若是出過

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

則出過諸相若出過諸相則是正位若菩薩在正位  
 是則名得無生法忍若得無生法忍一切能忍亦忍  
 於空亦忍於人何以故不離於人名之爲空相何以  
 故是相人即是空忍於無相亦忍於相何以故是相  
 實性即是無相忍於無願亦忍於願何以故願實性  
 相即是無願一切法性及衆生性一切常滅亦如是  
 忍何以故一切衆生生死之性猶如幻夢是名菩薩  
 得無生法忍不違一切法不逆一切法若順此忍則  
 亦忍隨順諸法無去若無去則無來若無去來知一  
 切法是常住如法常住衆生亦爾若得是處如法隨

順如處修行是名成就無生法忍一切言說即是音  
 聲爲語他故起是音聲是無生法忍無有能說無有  
 能聽何以故是義不可得故而是法忍非聲非說善  
 男子如來世尊有是威德同不可得義不可得義說  
 於有得

大樹緊那羅王所問經卷第一

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

大樹緊那羅王所問經卷第二

大樹緊那羅王所問經卷第二

姚秦三藏法師鳩摩羅什譯

爾時天冠菩薩白佛言世尊未曾有也而是大樹緊那羅王成就如是不思議法世尊是緊那羅王乃能成就如是勝妙神通之力復能演說甚深法忍世尊緊那羅王於幾佛所種諸善根有如是辯佛言善男子假使能數恒河沙等世界星宿不能數是緊那羅王所事如來應正徧覺善男子是人已於爾許佛所修行梵行集於無上正真之道是故得有如是辯才爾時天冠問緊那羅王汝於爾許無量佛所種植無

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

量無邊善根何故不成無上正道爾時大樹緊那羅王語天冠菩薩善男子菩薩摩訶薩有十二無滿足法何等十二謂供養給事諸佛世尊無有滿足集諸善根無有滿足聽集法寶無有滿足修禪解脫無有滿足修觀寂法無有滿足流通顯法無有滿足教化衆生無有滿足守護正法無有滿足不捨阿練兒處無有滿足滿諸波羅蜜莊嚴佛土無有滿足修習福慧無有滿足集助菩提法無有滿足善根莊嚴無有滿足薩十二無滿足法是故菩薩求善根莊嚴無有滿足爾時大樹緊那羅王白言世尊我聞菩薩所有三昧

名曰寶住若有菩薩得是三昧一切法寶諸功德法自然而得善哉世尊唯願如來演說於是寶住三昧菩薩聞已於一切法而得自在隨增長法爾時佛告大樹緊那羅王如是緊那羅王有於三昧名曰寶住汝今善聽善思念之吾今當說如是菩薩寶住三昧善哉世尊願樂欲聞受教而聽佛告大樹緊那羅王若有菩薩欲令佛寶種性不斷法寶種性僧寶種性不斷絕者修習起生八十種寶何等八十不忘一切智寶之心不捨離於志意寶心不捨修諸善根寶心不捨堅入寂定寶心生起一切布施寶心不希望報

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

清淨寶心廻向菩提故莊嚴身寶心滿三善故莊嚴口寶心離四過故莊嚴意寶心捨離無明愛恚見故持戒不毀不穿不壞不缺寶心不穿不壞不缺不汙戒莊嚴故無惱害寶心於諸衆生意平等故柔忍寶心能忍難事故不憂身命清淨寶心淨菩提故無愛恚寶心無高下故堅固牢強莊嚴寶心無憂慮故一切所作成就寶心無慢緩故堅固念慧進入寶心能善修習助菩提法故起禪解脫三昧寶心得心自在故集法寶心集自在財故聞正法已能持寶心得無畏故不格法寶心心無吝故不期利養說法寶心捨

離惡欲不望報故正念寶心正流趣故如所聞法成滿寶心如聞行故智觀寶心無降伏智故大慈寶心化衆生故大悲寶心觀衆生故大喜寶心愛樂法故大捨寶心諸法寂故不厭生死寶心集諸善根故化衆生寶心不住自樂故四攝寶心爲攝法故起神通寶心一切神通現變化故善知識寶心爲聞法故離惡知識寶心集善根故爲一切衆生正修寶心如涅槃故離諸一切結病寶心入一切衆生所志欲故於一切法生樂想寶心寂諸病故善修學習無慢寶心知大人法故滅憍慢寶心於諸衆生謙卑下故無幻

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

僞寶心無詣詎故和敬寶心令法久住故護法寶心報去來現在諸佛恩故知恩報恩寶心親友究竟故不望報寶心無所觀故常出家寶心不忘所作故愛樂寶心護白淨故聖種少欲知足寶心集持戒故莊嚴一切頭陀功德寶心於諸衆生無有過故少欲知足寶心慧無足故獨處寶心身意寂靜故求法無厭寶心滿相好故莊嚴集智無厭寶心斷諸一切衆生疑故念佛寶心不離見佛故念法寶心不離聞法故念僧寶心不退菩薩僧故念戒寶心不捨菩提心故念捨寶心捨諸結使故念天寶心繫在一生補處菩

薩地中故義辯寶心覺一切義故法辯寶心不壞法界法故辭辯寶心覺了一切諸音聲故樂說辯寶心悅可一切諸衆生故得陀羅尼寶心隨所聞法不忘求故依義寶心知文字實性故依智寶心知識如幻故依了義經寶心於了義中無違諍故依法寶心覺了人實性故觀一切行無常寶心不住一切三界中故觀一切法無我寶心我及衆生俱無我故觀於涅槃寂靜寶心究竟寂靜故觀空無相無願解脫門寶心入甘露門故觀一切法無生寶心得無生法忍故見一切法如幻如夢如焰如影如響如水月寶心不

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

住諸見故順因緣法寶心離斷常見故離諸邊見垢穢寶心離於二故入無二法門寶心覺一道故離一切行寶心至正位故正觀法位寶心一切法平等故集助一切菩提法寶心覺了一切諸佛法故如是緊那羅王若有修習如是等法善修好修正住獲得如說修行是名菩薩寶住三昧若能如是則便得是寶住三昧若有菩薩已逮得是寶住三昧無世間寶出世間寶而是菩薩不得自在緊那羅王云何世間寶出世間寶緊那羅王世間寶者謂人天豪尊若帝釋豪尊梵王豪尊護世豪尊轉輪王豪尊居士豪尊婆

羅門豪尊長者豪尊刹利豪尊雖得如是人天豪尊而不放逸以不放逸能集一切助菩提法是名世間寶何等名爲出世間寶所謂聖慧是出世間何以故智慧悉攝出世間法是故說入般若慧門名出世間緊那羅王譬如大海爲衆流主如須彌山爲衆山王猶如衆星月爲其主如諸藥草火珠光明日爲其最一切禽獸師子爲最一切民庶王爲其最二十三天帝釋爲最諸梵天中梵王爲最如是緊那羅王所有一切出世間法智慧爲首是故說言般若爲諸衆經中王能度諸流是安隱道故是名爲炬照結闇故是

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

名勇健降衆怨故是名醫王和衆藥故是名爲師知  
經書故是名爲箭射結的故是名爲力究竟害結故  
是名大象拔結根故是名無違諍悉平等故是無鬪  
諍無訟訴故是名不逆善隨順故是名無瞋究竟盡  
故是名善知四聖諦故是名爲念正念處故是名爲  
正能正斷故是名示現神足力故是名爲戒障諸根  
故是名降伏有大力故是名爲覺善覺知故是名開  
示示正道故是名爲寂寂靜定故是名爲明作慧明  
故是名作明離障翳故是至正處作照明故是名除  
斷除結塵故是無波浪度諸流故是不可見過境界

故是無境界離內外故是名爲空離見岸故是名無  
相離覺觀故是名無願出三界相故是名一相無有  
相故是虛空相無相似故是害愛慢離魔業故施無  
妄想不依於戒不住忍辱不起精進不染著禪無言  
說門無一切門方便自造無我無衆生度到彼岸集  
諸善根無作無作者過諸作道緊那羅王是則名爲  
出世間寶謂般若寶是智慧寶即是寶住三昧之體  
若菩薩得寶住三昧一切衆寶皆悉來集緊那羅王  
喻如大海爲衆流王集一切寶一切衆寶皆悉來歸  
於是海中出生諸寶如是緊那羅王菩薩得是寶住

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

三昧爲諸一切衆生之主集一切寶一切法寶皆悉歸趣緊那羅王寶住三昧能集一切諸法之寶是中不斷於三寶種是寶住三昧名爲集聚諸法之寶爾時天冠菩薩白佛言世尊是大樹緊那羅王已逮得是寶住三昧耶佛言善男子汝今自問大樹緊那羅王當爲汝說時天冠菩薩卽問大樹緊那羅王緊那羅王汝今已逮得是菩薩寶住三昧耶答言善男子是三昧中無住無得是三昧中無有得者而是三昧非色受想行識而是三昧非色可見無聲可聞非是住相非是滅相無有處相非無相非一相所言相者

都無有相無能爲作三昧相者自無有相亦非無相無相是三昧相應如是修善男子是三昧者等一切法若等諸法亦等於我若等於我亦同等於一切衆生是故善男子是三昧等一切衆生何以故一切衆生卽是空相空相是三昧相一切衆生卽是無相相無相相是三昧相一切衆生卽是無願相無願相是三昧相一切衆生及一切法是寂靜相寂靜相是三昧相一切衆生是無我相無我相是三昧相是三昧者無能以身觸無能以心觸凡可觸法若等不等一切皆爲善調伏故而演說之時天冠菩薩卽白佛言

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

希有世尊是大樹緊那羅王處在如是放逸之中乃能演說甚深妙法佛言善男子菩薩從慧方便地中出生示現一切所作不爲一切所作汙染善男子是大樹緊那羅王以此琴樂諸簫笛音及妙歌音調伏七十億緊那羅衆令住菩提三十億乾闥婆於無上道而得調伏其內眷屬八萬四千住一切智彼有如是大方便智善男子我唱是言是諸菩薩隨所居住在於本處隨是諸處多利衆生善男子猶如無薪火則不然如是善男子菩薩處寂亦復如是不能熾然教導衆生善男子如大薪聚火則熾然菩薩亦爾處

在多衆教導熾然善男子是故當知菩薩住在最豪尊處隨所住處多利衆生天冠菩薩復白佛言是大樹緊那羅王云何以琴及妙歌聲諸妓樂音教化衆生佛告天冠菩薩善男子緊那羅等乾闥婆等摩訶羅伽等好樂音樂是大樹緊那羅王善自調琴和衆妓樂是緊那羅衆乾闥婆衆摩訶羅衆起大愛樂信解增敬得是愛樂信解增破已於是音中出於佛聲法聲僧聲不忘菩提心聲施聲戒聲忍聲進聲禪聲慧聲慈聲悲聲喜聲捨聲念處聲正斷聲神足聲根聲力聲覺聲道聲定聲慧聲禪定解脫三昧之聲無

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

常聲苦聲無我聲寂聲空聲無相聲無願聲無生聲  
 無起聲無行聲菩薩法藏所攝法聲陀羅尼金剛句  
 三昧滿聲不退轉法輪聲一切決定法王聲大海莊  
 嚴三昧聲一切法流入平等三昧聲等一切法自在  
 三昧聲莊嚴智慧三昧寶住三昧聲寶有三昧聲寶  
 降伏三昧聲寶炬三昧聲娛樂三昧聲蓮華莊嚴三  
 昧聲過蓮華三昧聲徧一切處三昧聲一切法白蓮  
 華三昧聲增益三昧聲大奮迅三昧聲師子奮迅三  
 昧聲日燈三昧聲無量旋三昧聲前進三昧聲金剛  
 場三昧聲金剛幢三昧聲金剛不壞三昧聲地持三

昧聲山燈三昧聲山幢三昧聲寶藏三昧聲寶華三  
 昧聲寶心自在三昧聲觀一切衆生心三昧聲出增  
 長一切行三昧聲修深堅三昧聲雜辯三昧聲無觀  
 三昧聲觀一切衆生三昧聲遊戲三昧聲出一切神  
 通境界三昧聲降魔界三昧聲現一切色三昧聲入  
 一切三昧聲分一切身三昧聲住一切行三昧聲慧  
 燈三昧聲手燈三昧聲觀菩提三昧聲過樂辯三昧  
 聲作入一切功德三昧聲善男子是琴歌音諸妓樂  
 中出於如是三昧法聲令諸衆生受化而去菩薩摩  
 話薩成就如是希有之法說是大樹緊那羅王諸功

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

德行神力之時以佛力故有天曼陀羅萃聚令諸大衆各散大樹緊那羅王大樹緊那羅王以神通力右手接持無一華墮地而在手爾時大樹緊那羅王卽以供養散於如來上當散萃時佛神力故令是衆萃成一寶蓋覆千世界是寶蓋中垂懸無量千萬億數寶真珠貫一一珠貫出於無量萬億光一一光明出寶蓮華雜色妙好妙香適意諸萃臺中一切皆現釋迦牟尼如來色像結跏趺坐如是諸佛皆讚大樹緊那羅王善哉善哉緊那羅王乃能教化無量衆生菩薩應當如是施作旣出世間還來世間教化衆生

生死已盡還來受有得涅槃位還遊三界於是中生教化衆生爾時大樹緊那羅王作如是念我今當作一一寶蓋覆一一佛上爾時是王卽入三昧名莊嚴寶蓋當其入是三昧之時有妙寶蓋一一各覆諸如來上一切大衆右手亦各執持寶蓋以爲已用供養於佛是時大樹緊那羅王復作是念我今當請釋迦如來及諸菩薩并聲聞僧一切大衆至香山中我宮殿食令無量無邊天龍夜叉乾闥婆阿修羅迦樓羅緊那羅摩睺羅伽等集令聽法我身當供養如來給使令彼衆生長夜利益安隱快樂爾時大樹緊那羅

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

王作是念已頂禮佛足合掌白佛言惟願世尊及菩薩衆并聲聞僧哀愍我等至香山王受請七夜令無量衆生增長善根世尊我今堪任能爲走使哀愍大樹緊那羅王及菩薩衆諸聲聞僧當至香山七日之中憐愍我故爾時緊那羅王知佛可已歡喜踊躍徧滿其身與其夫人男女眷屬作衆妓樂供養於佛禮世尊足右遶三匝出衆而去還至香山是時大樹緊那羅王於香山中莊嚴自己所住園林爲供如來莊嚴妙地縱廣五百由旬青瑠璃地闇浮檀金以爲間錯衆寶雜色互相映發是時場上敷百千妙座以寶蓮華而間錯之敷置百千萬億天衣復於場上爲佛如來敷師子座高三十二由旬衆寶嚴飾衆寶欄楯而圍遙之張施幢蓋堅衆幢幡無量香丸燒堅黑沉水上張繒綵以承塵露周徧垂懸幡蓋繒綵散衆天華於座四面作大寶樹雜色妙好外多衆來及自眷屬皆悉已集便爲說偈而教授之

佛出於世時乃值猶如優曇鉢羅華  
人尊今已出現世善好恭敬供養之  
捨慢懈怠及誑僞亦離慳貪及幻惑  
皆當捨離諸戲笑善好恭敬於導師

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

所有衆妙適意華 天中勝華香山華  
 皆當聚集置一處 當以供養於人仙  
 所有衆妙適意香 墓黑沉水及栴檀  
 當於此間香山中 燒用供養勝衆生  
 所有妓樂妙歌音 緊那羅等所愛樂  
 各各善調諸音樂 當以供養丈夫仙  
 幢幡寶蓋及妙衣 柔軟善淨適天意  
 張設以待供如來 難值難得無有比  
 供養佛已至善處 或爲帝釋四天王  
 或作梵王自在王 常作人天中尊王

形色威德及名稱 眷屬侍從及珍寶  
 所有言教悉受用 供養佛已得是利  
 諸天歡樂及人樂 欲於生死常歡樂  
 欲得常樂及樂具 當供養是勝衆生  
 欲得緣覺聲聞乘 及得最上勝妙乘  
 又欲降伏於魔怨 當作供養供法王  
 爾時大樹緊那羅王如是教令諸眷屬已即時集聚  
 諸華香曼塗香末香辦百味食已住香山王前作衆  
 音樂歌諸偈頌白言時到  
 佛能利益施安樂 和顏喜笑柔軟語

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

經

大般若經卷三十一

三

五五

妙華善聽人天供

時到善逝今可來

十力降伏諸魔力

降伏他眾利益世

斷除諸垢無垢濁

時到利益世尊來

樂頭陀行無染著

勝集念慧堅固者

勝人常出過世間

歡喜心來作利益

隱蔽日月珠光明

釋梵王有諸光明

牟尼光明皆喜樂

光明自在蔽諸光

天龍緊那羅歌聲

是聲增結不滅欲

佛音柔軟梵音聲

能滅諸結與安樂

世醫遊行於十方

不能治世煩惱病

十力醫王演妙音

滅諸結使與安樂

大名大威力無等

無比無錯無濁語

伏怨寂怨離諸怨

世尊利益願時來

施調施主慧甘露

持戒行戒尊最勝

善巧調忍熏修心

念我故來可愛者

善具進力相應法

住於禪定具神通

慧調伏意漸得備

持百福相願時來

大慈悲心意平等

離愛欲過無使患

· 善知梵道住佛道

世尊施樂願時來

爾時世尊知大樹緊那羅王白言時到告諸比丘各

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

續

大般若經卷二十一

三

五五

持衣鉢受七夜請差守房人大樹緊那羅王白言時  
到是時天冠菩薩作是念言我今當化作大寶臺令  
佛世尊及諸菩薩衆大聲聞僧安處寶臺坐於蓮華  
莊嚴座上置之右掌乘空而往至香山中天冠菩薩  
作是念已卽入三昧以三昧力作大寶臺縱廣高下  
各十由旬雜色妙好四方四柱莊嚴差別時寶臺中  
出於百千寶蓮華座復爲世尊敷寶蓮華師子之座  
上高七仞爾時天冠菩薩化作寶臺及華座已白言  
世尊願就寶臺坐師子座及諸菩薩聲聞大衆憐愍  
我故世尊我今當以如是寶臺置於右掌著香山中

爾時世尊愍天冠菩薩卽昇寶臺就師子座諸菩薩  
衆及聲聞僧次第而坐時天冠菩薩卽擎寶臺置右  
掌中上昇虛空往趣香山爾時欲界諸天色界諸天  
見天冠菩薩作是神變歡喜踊躍生希有心爲供養  
佛及天冠菩薩故持華香鬘塗香末香作衆妓樂來  
詣寶臺在虛空中供養於佛乃至香山爾時大樹緊  
那羅王遙見如來坐寶臺中從空而來見已與已眷  
屬八萬四千諸緊那羅等持香華鬘末香塗香作於  
八萬四千妓樂以清妙歌善和衆樂往迎如來到已  
及諸眷屬頂禮佛足以所齋持諸華香鬘塗香末香

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

供養佛已引前而去爾時世尊知已至彼與諸菩薩大聲聞僧釋梵護世及諸大眾詣大樹緊那羅王所莊嚴道場坐所敷座爾時大樹緊那羅王語釋梵護世及諸天子諸大德等可前就坐所爲如來施設飲食當共同嘗爾時緊那羅王與諸妻子男女眷屬手自斟酌敬意奉食種種多美雜味具足從於菩薩善根所生供養如來菩薩聲聞一切大眾悉皆充足既充足已緊那羅王知各洗鉢澡手已畢與已眷屬於如來前次第而坐欲得聞法爾時世尊爲緊那羅王及諸大衆演說妙法示教利喜爾時世尊卽爲演說

如是妙法緊那羅王菩薩有三十二法淨檀波羅蜜何等三十二緊那羅王菩薩不忘菩提之心而爲先導而行布施不讚下乘而行布施諸所爲者無傷毀心而行布施有來求者無侵害心而行布施又所請者起福田想而行布施諸所請者起於師想起善知識想而行布施捨內慳結而行布施無所貪借歡喜踊躍而行布施伸手正直善好放捨無所期爲而行布施生增上心不生下心而行布施不生惡處而行布施不望果報無所希望而行布施欲於佛法而行布施心無惱熱而行布施以攝爲首而行布施我當

1 2 3 4 5 6 7 8 9 210

1 2 3 4 5 6 7 8 9 210

1 2 3 4 5 6 7 8 9 210

教導化諸衆生而行布施我當護法而行布施我當順用如來言教而行布施我應當作降魔伴黨而行布施我宜應當正覺菩提而行布施我應當作善丈夫業而行布施我應當離餓鬼惡道而行布施我應當集修捨心因而行布施我當獲得大財封邑攝取他人而行布施我應當行和敬之法而行布施我當不離得善知識而行布施我應當於一切衆生無瞋害眼而行布施我應當以布施善根向無上道而行布施我應當學餘菩薩捨而行布施我宜應當莊嚴相好而行布施我宜應當淨佛國土而行布施緊那

羅王是爲菩薩三十二法淨檀波羅蜜緊那羅王菩薩復有三十二法淨尸波羅蜜善自淨身是名爲戒淨貪瞋癡故善自淨口是名爲戒不自欺誑佛及諸天是無虛妄相故善自淨心是名爲戒離無明貪瞋邪見故淨十善業是名爲戒生人天故不忘菩提心是名爲戒不貪餘乘故志意清淨是名爲戒捨幻僞故稱讚賢聖是名爲戒勤攝非聖故以慈爲首是名爲戒於諸衆生心平等故修大悲心是名爲戒趣向教化諸衆生故善好等學是名爲戒畢竟無缺故慚愧所攝是名爲戒怖畏惡道故無有穿漏是名爲戒

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

不中捨故無有瑕疵是名爲戒究竟自法故自己自在是名爲戒至餘佛土故尊重豪貴是名爲戒智者所讚故能超出過是名爲戒離惡道故善安止在是名爲戒一切安樂悉具足故諸佛所讚是名爲戒是佛戒故不自慢緩是名爲戒堅實救拔世間人故不自高毀他是名爲戒善棄捨故修行棄捨是名爲戒離諸煩惱故自己修行是名爲戒一切助道苦提法故住於歡喜是名爲戒離愛貪故善攝取他是名爲戒隨如說故調伏出家是名爲戒捨離一切家繫縛故堅欲修行是名爲戒欲樂法故決定少欲及與知

足是名爲戒依聖種故樂修頭陀是名爲戒欲捨一切諸惡法故無著相應是名爲戒觀無衆生故隨順不違是名爲戒順緣法故離一切見是名爲戒離斷常故緊那羅王是爲菩薩三十二法淨尸波羅蜜緊那羅王菩薩復有三十二法淨忍波羅蜜何等三十二不貪著身是名知忍不住壽命是名知忍無侵害心是名知忍堪耐惡言是名知忍悲於下劣是名知忍不輕末學是名知忍有大勢力能苦切他而不爲之是名知忍節節支解不起瞋恚是名知忍無有麤澀是名知忍不生嗔害是名知忍無不與語是名知

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

忍有於志意是名知忍其心無濁是名知忍無燒亂  
 心是名知忍護他人心是名知忍以財利益是名知  
 忍覺知大悲是名知忍滅除憍慢是名知忍謙下一  
 切衆生等是名知忍不增熾然是名知忍樂於寂靜  
 是名知忍閑宴無爲是名知忍自知已過是名知忍  
 他人有缺不見其過是名知忍如法財封是名知忍  
 有於信財是名知忍心無惱熱是名知忍意念安樂  
 是名知忍先意問訊無有瞋而是名知忍順甚深法  
 是名知忍順三解脫門是名知忍解無生無起是名  
 知忍於無生法忍緊那羅王是爲菩薩三十二法淨

忍波羅蜜緊那羅王復有三十二法淨進波羅蜜何  
 等三十二緊那羅王菩薩不斷佛種行進波羅蜜不  
 斷僧種行進波羅蜜受無量生死行進波羅蜜集無  
 量善根行進波羅蜜供養給事無量諸佛行進波羅  
 蜜爲欲攝持無量聞故行進波羅蜜爲欲教導無量  
 諸衆生故行進波羅蜜欲以如來妙說悅可一切諸  
 衆生故行進波羅蜜爲令一切衆生逆流故行進波  
 羅蜜爲諸衆生當設何宜行進波羅蜜捨一切所有  
 行進波羅蜜護一切戒無有毀缺行進波羅蜜一切  
 柔和忍辱無恚行進波羅蜜出故一切所作事故行

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

經

大藏經卷二十一

大

五五

進波羅蜜欲起一切禪定解脫諸三昧故行進波羅蜜滿無礙智故行進波羅蜜欲以一切諸佛國土所有莊嚴嚴已佛土故行進波羅蜜大力堅固越到彼岸故行進波羅蜜降伏一切諸魔場故行進波羅蜜降伏一切外道論故行進波羅蜜具佛十力無畏法故行進波羅蜜莊嚴身口意故行進波羅蜜能辦衆事無休息故行進波羅蜜心無怯弱故行進波羅蜜其心勇健故行進波羅蜜不共一切煩惱結住故行進波羅蜜摧伏一切諸煩惱故行進波羅蜜滅一切結故行進波羅蜜度諸流故行進波羅蜜脫未脫者

安未安者度未度者故行進波羅蜜集百福德莊嚴相故行進波羅蜜守護一切佛正法故行進波羅蜜神通徧至一切佛刹供養禮拜右逮恭敬於諸佛故行進波羅蜜此諸精進從寂靜生身心寂靜住無出無入無上無下爲於無生無起所攝緊那羅王是爲菩薩有三十二法淨進波羅蜜緊那羅王菩薩復有三十二法淨禪波羅蜜何等三十二法所謂念淨慧淨進淨慚愧淨堅實淨心體性淨不忘菩提心淨功德根淨無所依淨我我所淨起神通淨身寂靜淨修治心淨內寂靜淨外威儀淨斷諸見著淨觀無我無

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

衆生無人無壽無丈夫淨不住三界淨助菩提法現  
 前淨悲觀衆生淨除智障淨智慧超出淨不違因果  
 淨決定法忍淨修行無常苦空法淨轉方便淨方便  
 攝淨近道場淨不希望聲聞緣覺乘淨滿足無漏淨  
 心不散亂得佛定淨觀衆生心如應說淨緊那羅王  
 是爲菩薩三十二法淨禪波羅蜜緊那羅王菩薩復  
 有三十二法淨般若波羅蜜何等三十二法求集多  
 聞無有厭足善巧思惟分別諸法以已智慧覺了諸  
 法善分別陰善分別界趣法界故善於諸入知分別  
 故善於緣法知因住故善於諸諦知解滅故知於正

位不入正位故觀察無起起自心故知諸法無生本  
 際淨故知諸一切衆生無我離倒見故知一切法同  
 是一法本際離欲故知諸世界是一切界同虛空故  
 知一切佛同是一佛入不思議法界故善知分別一  
 切章句善文字故知無礙辯廣演說法悅可一切諸  
 衆生故知陀羅尼無忘失故知諸魔業教化諸魔向  
 菩提故觀知諸法如幻住於分別有差別故解知諸  
 法如電水月夢影響法諸法究竟無成就故覺知一  
 切衆生心性本自淨故善分別觀生死涅槃善學方  
 便故善知解空無相無願示解脫門故知一切法本

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

性寂靜本無縛礙故知一切法離障得明害無明闇  
故善知於智施慧光明爲欲解脫一切衆生演說法  
故知一切法無去來故知所作業不相違故知示衆  
生示生死故得成四辯解義法辭樂說辯故所說無  
錯法無不空自己寂靜調順解真知於涅槃智慧趣  
向諸佛智慧守護法城持一切法得受記地所作究  
竟住不退轉菩薩之地緊那羅王是爲菩薩三十二  
法淨般若波羅蜜緊那羅王菩薩復有三十二法淨  
方便波羅蜜何等三十二觀察衆生自無衆惡有無  
量福而不休息若有少福亦不休止爲化衆生而行

慧施不求福田於諸衆生起福田想不望果報教化  
下劣現爲下劣教諸衆生護持口業現女人像化諸  
年少現作童子化諸童女現一切色不違衆生自無  
憍恣現作憍恣爲化憍恣諸衆生故示現狂亂隨衆  
所解而爲說法百歲持戒爲化一人放捨此戒所有  
一切娛樂之具而共同之攝令人法自在頭陀爲不  
活潑諸衆生故現不活潑示現一切外道法中修出  
家行不呵佛法現爲妓女若在王宮現妙女身爲化  
堅著妓欲衆生於大衆中多人集處現衆技術或現  
簫笛琴瑟鼓貝常爲第一於是衆中歌舞戲笑皆出

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

法音現衆技術隨諸衆生所喜樂者爲教化故而示現之現神通力施衆生財然後說法失財衆生爲現寶藏然後說法有諸衆生憂箭所逼隨其所宜而爲示現然後說法若長者居士及諸小王內宮婦女憂無子息爲欲化導令其歡喜現爲其子於無伴中作大伴主將諸人衆至空曠野糧食乏盡求索無所以神通力化作飲食令充足已如應說法令不退轉於無上道若有衆生從生而盲羣相隨逐若一若二若三若四乃至一百若干二千乃至十千於彼衆前現爲盲人現極貧窮從外乞求給施諸盲令其得

眼覩見諸色隨應說法令不退轉於無上道若復有諸多千衆生造衆過罪爲王所繫菩薩爲脫是諸衆生牢獄繫閉現爲罪人同入是中以神通力悉解杻械施與衣裳充足飲食若爲說法令不退轉於無上道若有衆生犯罪應死爲教化故化作化人代彼罪人令其全命得無憂慮慰喻令喜而爲說法畢定住於無上正道若有衆生諍諸財利奴婢畜生舍宅田地共相撾打鬪爭訟訴以方便力現大財寶酬報是人令兩和合然後說法令住菩提行方便菩薩現作聾盲瘡瘍形殘醜陋之身捨已妙形同作彼像化衆

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

生故或復現作外道師導在遠而在讚歎三寶冀望  
佛種故方便菩薩捨諸禪定生於欲界化衆生故或  
復現爲諸無學人希望涅槃示現涅槃倍勤精進修  
諸法行方便菩薩示現修行獲得正位現入涅槃而  
甫修行於勝妙行方便菩薩爲未得正位欲涅槃者  
於是人前現如來像爲令其人住菩提故緊那羅王  
是爲菩薩三十二法具方便波羅蜜說是諸波羅蜜  
時大樹緊那羅王諸眷屬中九十萬六千衆生發於  
無上正真道心如來衆中八千菩薩得無生法忍大  
樹緊那羅王得智燈三昧是時大樹緊那羅王從佛

聞法示敎利喜已歡喜踊躍得未曾有以無價衣供  
上世尊菩薩聲聞各各施衣以所住園林及中所有  
一切奉施供佛如來爾時大樹緊那羅王有八千子  
以衆寶華莊嚴八千微妙蓋已奉供如來當奉蓋時  
佛神力故令諸寶蓋在虛空中合爲一蓋覆百由旬  
時緊那羅王八千諸子見佛神力歡喜踊躍得未曾  
有專心至意發阿耨多羅三藐三菩提心皆不退轉  
各發心已白言世尊願與我等助菩提法我等聞已  
當修行之

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

# 大樹緊那羅王所問經卷第二

大樹緊那羅王所問經卷第二

五五

## 大樹緊那羅王所問經卷第三

姚秦三藏法師鳩摩羅什譯

爾時世尊知大樹緊那羅王諸子之心所欲樂已上  
昇虛空高七多羅樹放大光明是光徧照於此三千  
大千世界欲界諸天所有妓樂乾闥婆緊那羅等所  
有妓樂不鼓自鳴出微妙音香山王中所有樹木亦  
皆悉出微妙音樂爾時世尊復於身上諸毛孔中各  
放無量萬億光明一一光端各有蓮華一一華中各  
有菩薩三十二相而自莊嚴坐華臺中於時世尊以  
神通力令諸妓樂演出智偈問諸所疑令諸華臺所

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

有菩薩以一一偈答其所問

- 云何而發起 無上菩提心 終不忘此心  
 乃至覺菩提 專志心成就 爲諸衆生故  
 起大悲莊嚴 不忘菩提心 彼志意云何  
 彼當云何行 所說大悲心 云何生起是  
 志意無詣偽 所修行無詐 住衆生涅槃  
 彼大悲如是 云何行於施 施已心無執  
 亦不希望報 回向於菩提 所施一切捨  
 彼施已無悔 趣向菩提道 是不望果報  
 云何住於戒 不生於戒慢 救於毀禁者

- 大乘無有上 戒是菩提心 空無不起慢  
 起於大悲心 救諸毀禁者 云何忍衆生  
 罷誓及呵叱 心終不起瞋 倍增生歡喜  
 我爲衆生醫 療治衆病患 若聞惡言已  
 不起於瞋恚 云何彼行進 云何修習行  
 云何心無倦 修於菩提行 精進護衆生  
 護法常勤進 善根悉充足 彼心無疲倦  
 云何修正念 勇健勝進行 云何修禪定  
 心無有馳散 無有馳想念 慧無有詣偽  
 以方便行禪 彼心無馳散 云何得智慧

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

卷三

大般若經卷三

云何見正直

云何作決定

云何分別法

修聞增智慧

本習直心故

決定行法施

隨義而修行

云何彼求聞

云何得多聞

云何聞而說

大人云何去

彼恭敬故聽

習近多聞者

說不爲財利

大人如是去

云何彼行慈

云何行大悲

喜捨悉成就

云何住梵道

慈心悉平等

大悲無疲倦

隨喜名爲喜

是能至梵道

云何得見佛

見已生信心

云何彼聞法

云何除斷疑

修行念於佛

得見世導師

信心得具足

聞法已無疑

云何福莊嚴

云何智莊嚴

若定及與慧

彼云何莊嚴

莊嚴福無厭

學問莊嚴智

心寂名爲定

知法名爲智

云何彼行處

居住止何相

彼行處云何

彼云何修行

彼行法空處

捨是彼岸句

彼行住四禪

修行脫衆生

云何是魔業

佛正業云何

造作何等業

得於菩提護

下乘爲魔業

大乘爲勝道

捨離一切惡

得於菩提護

云何近善友

惡友何等相

云何平等去

捨離於邪見

若讚菩提道

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

善親近彼人	菩提心善淨	捨離惡知識
知諸業行已	修行正真見	捨離邪相應
此不失正見	云何護正法	及教化衆生
彼方便云何	能得成菩提	精進護正法
方便能教化	捨離二邊法	能得勝菩提
云何作智業	云何適意業	云何速受教
常恭敬右達	無諍是智業	不起於諍訟
口柔軟善語	恭敬而右達	道是何等相
云何是非道	云何能安彼	叵思衆住道
六度爲正道	下乘爲非道	學方便智已
令衆生住道	云何得大富	云何獲大利
寶藏爲云何	云何滿衆生	七財爲大富
寂靜爲大利	陀羅尼寶藏	辯說令充滿
彼父母是誰	親族何等相	侍從有何相
嚴飾智慧者	慧母度彼岸	助道法親族
諸善根侍從	莊嚴於智者	解法無我已
慈心普偏世	無我及與慈	是義云何等
若解知於空	彼自了無我	是爲最上慈
今世知於空	未來無有來	諸行性如是
業報亦如是	云何而有生	第一義無是

1 2 3 4 5 6 7 8 9 2001 2 3 4 5 6 7 8 9 2012 3 4 5 6 7 8 9 2020

亦無有去者 入於世諦道 說業及業報

若空與無相 及無願解脫 一相同無相

云何而生道 空即是無相

以無相故得

一相同一義 故說解脫門 云何觀於空

云何觀衆生 空及與衆生

云何而得生

智慧觀於空 方便觀衆生

大悲以教化

趣向於涅槃 無生無有起

一切法如是

云何生諸行 應當解此義

無生與無滅

是智所行處 從於誓願生

此方便所建

云何得受記 云何不退轉

云何忍所緣

云何得決定 住平等受記

法界不退轉

無生是忍緣 知法得決定

道場何所場

菩提何等相 誰名爲如來

云何佛得明

虛空名道場 菩提虛空相

不依於身心

如如名如來

爾時大樹緊那羅王諸子聞說如是法已得柔順法忍各各以自所著瓔珞供上如來而作是言世尊今於我等爲佛出世我等今日乃得聞是甚深之法希有世尊乃能令諸妓樂音中說偈問疑令菩薩像答其所問能斷一切諸大衆疑我等聞已得大法明世

1 2 3 4 5 6 7 8 9 2001 2 3 4 5 6 7 8 9 2101 2 3 4 5 6 7 8 9 2201

尊是誰所持時佛答言諸賢士等當知皆是如來力持如來又能持於虛空說如是法諸賢士等佛力如是不可思議爾時大樹緊那羅王子白言世尊願令一切諸衆生等得如是力爾時大樹緊那羅王夫人婬女八萬四千其手各各持真珠貫往世尊所到已頭頂敬禮佛足各以珠貫供散佛上當其散時佛神力故於虛空中化成八萬四千真珠大臺四方四柱莊校分明諸寶臺中各有牀座衆寶交絡敷百千天衣是諸座上各有如來結跏趺坐三十二相八十種好而自莊嚴爾時緊那羅王八萬四千諸夫人等見

佛神力歡喜踊躍得未曾有皆以深心發阿耨多羅三藐三菩提心得不退轉既發心已歡喜踊躍皆共同聲以偈歌詠讚歎如來

最勝無上應供養 其所利益叵思議

善學利益調伏法 我今頂禮於勝人

離貪瞋癡及諂偽 離煩惱習無畏聲

從大寶藏開示法 稽首讚禮離欲尊

五眼清淨無結垢 善能降伏諸怨敵

不染三有如蓮華 得到彼岸我頂禮

能與世間明慧眼 能蔽日月諸光明

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

出生轉輪聖王種	持於輪相我讚禮
心常不染著諸色	導師作歸作救護
無與尊等況有勝	妙音演說我頂禮
於利無利等無著	悉知一切諸世法
墮愛網者令解脫	導師世尊我讚禮
常調伏心住禪定	燒諸結使住十力
演說法施非食施	無上福田我頂禮
所說微妙具相好	棄捨遠離於左道
語聲柔軟如雷音	稽首超過於三界
人尊已離焦熱惱	神通遊至無量土
造堅牢船度世間	我稽首禮讚如來
世尊演說信及進	度脫世間諸結礙
聲聞所有六通行	離於六道稽首讚
我今稽首金山色	稽首調伏寂定根
我今稽首滿月面	稽首持德人中上
摧伏一切衆生結	超度四流難度河
我等今者歸命是	調根世尊我敬禮
尊本世時大布施	施乞求者心歡悅
最妙珍愛悉施他	健施善逝我頂禮
見諸癡慢醉衆生	善知是等所造因

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

聖道最勝無有上 尊善導引安是處  
陰界本性常空寂 諸結無實虛僞有  
導師斷世諸疑悔 時語世尊我讚禮  
常住實法諸三昧 於法自在到彼岸  
智慧調御最無上 我稽首禮大商王  
離於幻僞諸欺詐 大力降伏諸魔軍  
明智善導人中上 猶大猛風無礙著  
盡諸淵底到彼岸 人尊寶藏無窮盡  
如恒河沙諸如來 尊本行時常供養  
得於世中不動搖 離愛過患到彼岸

親近諸佛住善處 是故敬禮人中上  
棄生老病死畏怖 憶念千億本生處  
極大愛網甚可畏 慧日光照令枯乾  
導師獨覺悟諸法 手足輪有吉祥相  
吉祥奉施禾輶草 吉祥世尊我頂禮  
自在超出陀羅尼 常以法施非財施  
人尊擊於大法鼓 法王世尊我讚禮  
從釋王種中出生 諸根常寂心亦寂  
三有導師常寂滅 寂靜心者我讚禮  
魔王執持利劍來 及諸魔衆樹王下

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

不能令尊一毛豎 不動如山稽首讚  
 人尊到彼精進岸 爲諸衆生荷忍苦  
 生死都盡不受有 說忍世尊我讚禮  
 得大勢力無傾動 善住無畏處非處  
 安無量衆作菩提 世尊善作我讚禮  
 知諸有爲不堅牢 捨離眷屬行出家  
 三有知最無有上 智到彼岸我讚禮  
 衆生苦惱無救護 以三寶法充足之  
 安置住於無難道 實救世尊我頂禮  
 尊修智力知諸根 破壞惡魔諸軍衆

所說音聲最尊妙 善修諸根我讚禮  
 聽聞正法欲爲根 復以此欲欲菩提  
 平等普蔭不擇親 實覆世者我讚禮  
 善逝自覺了諸法 自轉無上聖法輪  
 知諸行相猶如夢 令諸衆生識真實  
 爾時大樹緊那羅王諸夫人等偈讚佛已白言世尊  
 我等皆發無上道心終不以是女人之身成阿耨多  
 羅三藐三菩提善哉世尊願爲我等如應說法令我  
 等輩轉捨女身得男子身疾成無上正真之道爾時  
 世尊語緊那羅王諸夫人等諸姊諦聽善思念之吾

1 2 3 4 5 6 7 8 9 2001 2 3 4 5 6 7 8 9 2012 3 4 5 6 7 8 9 2020

當演說轉捨女身成男子身疾得無上正真之道善哉世尊受教而聽佛言諸姊女人成就於一法行捨女人形得男子身疾得無上正真之道何等爲一謂菩提心一切智心同爲一心一切三界最勝之心不忘一切善根莊嚴諸姊是爲女人成就一法轉捨女身得男子身疾成無上正真之道復次諸姊女人成就二法轉捨女身得男子身疾成無上正真之道何等二謂親近佛非事餘天離於邪見是爲二轉捨女身乃至疾成無上正真之道復次諸姊女人成就三法轉捨女身得成男子何等三所謂身戒口戒意戒

是爲三復次諸姊女人成就四法轉女人身得成男子何等四謂無僞心而行布施不以詐僞修持於戒以恭敬意趣向賢聖聽受正法是爲四復次諸姊女人成就五法轉女人身得成男子何等五謂愛法樂法欲法聽法既聞法已正念觀察穢狀女身常喜欲得成男子身是爲五復次諸姊女人成就六法轉女人身得男子身何等六謂速疾柔軟質直無僞無幻無詐正直之心是爲六復次諸姊女人成就七法轉女人身得成男子何等七所謂念佛欲得佛身故常念正法欲得佛法故常恒念佛僧自得僧故常恒念佛

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

誓願淨故常恒念捨捨諸煩惱故常恒念天明了菩提心故觀諸衆生歡喜心故是爲七復次諸姊女人成就八法轉女人身成男子身何等八不貪著食不貪飲醺不貪丈夫不貪末香塗香不貪遊觀園林不貪戲笑不貪歌音及諸妓樂不貪舞戲不貪交會酒樂是爲八復次諸姊女人成就九法轉女人身得男子身何等九不說有我不說有衆生不說有壽命及人丈夫不說斷見不說常見不著有見不著無見善解因緣法是爲九復次諸姊女人成就十法轉女人身得男子身疾得阿耨多羅三藐二菩提何等十於

諸衆生修行慈心於他財封不生貪愛不思念他男子之人失命因緣終不妄語不作兩舌不麤惡語不無義語不起無明不爲瞋恚有正直見依於業報諸姊是爲女人成就十法轉女人身得男子身疾得阿耨多羅三藐三菩提復次諸姊女人應當觀察深法觀色如水沫不貪酒醉色觀受如泡於樂受中不生貪著於苦受中而不捨離於不苦不樂受不生癡結觀想如焰是中不起男想女想觀行如芭蕉解知諸行無有堅實如是觀已不住諸法不起想著觀識如幻解知心識如幻人來如是知已於一切法都無所

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

染觀知此身地水火風四大和合諸大所成假名爲身猶如草木牆壁瓦礫是身如影無我無衆生無命無人無有丈夫因業所作而自迴轉諸界妄想猶如空聚如實觀眼唯是肉段其性空寂如是正觀耳鼻舌身意性空寂解身如鏡像解知言說猶如響聲觀心如幻如是諸姊女人觀察如是諸法速轉女身成男子身疾得阿耨多羅三藐三菩提是時大樹緊那羅王夫人嫁女聞佛說此轉女身法聞此法門歡喜踊躍得未曾有頂禮佛足至心不起是時世尊知緊那羅王諸夫人等心所念已即便微笑佛之常法若

微笑時若干百千青黃赤白紅紫等光從面門出遍照無量無邊世界上至梵世蔽日月光還來在於佛前而住遶佛三匝從頂上入爾時大德阿難卽從座起整衣服偏袒右肩右膝著地合掌向佛而說偈言

我問無垢喜見面

我問無垢特威德

我問善能斷諸疑

我問能利益世間

我問持淨最妙色

我問持清淨戒

我問人天中最上

我問樂持清淨戒

我問樂忍得忍力

何所利故而現笑

1 2 3 4 5 6 7 8 9 2001 2 3 4 5 6 7 8 9 2012 3 4 5 6 7 8 9 2020

- |         |         |
|---------|---------|
| 我問住於精進力 | 我問住禪具神通 |
| 我問其智等虛空 | 無等何緣而現笑 |
| 我問善逝大慈心 | 我問大悲哀世間 |
| 我問樂喜及大捨 | 以何因緣而現笑 |
| 我問度到三垢邊 | 我問無垢淨三眼 |
| 我問常樂三脫門 | 以何緣故而現笑 |
| 我問能摧伏他衆 | 我問能說甘露法 |
| 我問能闍蔽諸魔 | 大悲願說笑因緣 |
| 我問能持勝十方 | 我問猶如金山色 |
| 我問得到功德頂 | 爲何利益而現笑 |

爾時佛告大德阿難汝今見是大樹緊那羅王諸夫人不今於我所種善根已至誠發於阿耨多羅三藐三菩提心欲轉女身取男子身頂禮我足阿難白言已見世尊佛告阿難緊那羅王諸夫人等以此至誠植諸善根於此命終捨女人身得成男子生兜率天與彌勒菩薩共守護我無量阿僧祇劫所集無上正真道法彌勒成佛復當供養如是次第賢劫千佛皆悉供養漸次滿足助菩提法是大樹緊那羅王得成佛時是諸女等當生其國彼佛如來當授其記爾時大樹緊那羅王白言世尊今佛世尊已爲我等大作

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

佛事永淨惡道安住善道示菩提道住於智慧大寶  
之藏成辦一切出世善根說助成就波羅蜜伴示善  
方便勸菩提心聞法充足得示敎利喜愛樂深法悉  
得安住不退轉地世尊我等今者當作知恩非不知  
恩世尊我等今者若以肉血髓腦尚不報恩況餘珍  
寶爾時會中有餘菩薩作如是念是大樹緊那羅王  
幾時當得阿耨多羅三藐三菩提得成佛已號字何  
等其佛國土莊嚴云何諸菩薩衆以何莊嚴所受用  
物復何相類爾時世尊知是菩薩心之所念即便微笑  
無量百千種種色光從面門出普照十方恒河沙

等諸佛世界休息一切衆生苦已徧至天世還來達  
佛滿千帀已從頂相入爾時阿難卽從座起頂禮佛  
足右遶七帀在如來前合掌住立而說偈言

我禮善逝未曾見 如是事相之微笑

徧照無量億世界

十方猶如恒河沙

帝釋梵王及護世

日月珠火星光明

人尊光明普隱蔽

願說以何因緣笑

寂滅三惡諸苦惱

衆生離結得歡悅

人天得樂及餘衆

清淨衆生何緣笑

誰有人天住大乘

誰當得證轉法輪

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

誰爲得滿上菩提 勇健放斯淨妙光

法王願爲我斷疑 及餘人天得無疑

大衆歡喜願欲聞 爲誰故現是微笑

爾時阿難偈問佛已右遶三匝還復本座爾時世尊  
猶如大龍顧視十方告阿難言阿難汝今見是大樹  
緊那羅王作廣博供養如來不阿難白言已見世尊  
佛告阿難是大樹緊那羅王過六十八百千億劫已  
當得作佛號功德王光明如來應供正徧覺明行足  
善逝世間解無上士調御丈夫天人師佛世尊國名  
無垢月劫名有寶阿難是無垢月世界之地平如手

掌白瑠璃爲地猶如月色極淨無垢無諸荆棘瓦砾  
沙石有妙寶臺住虛空中諸菩薩等在地經行於經  
行時兩邊有功德王光明如來世尊像現是諸菩薩  
見如來像卽得是念一切諸法亦皆如像若有衆生  
於法有疑卽問佛像問佛像已便能受持得無生忍  
一切衆生皆依虛空寶臺而在彼佛國土無女人名  
其國衆生皆悉化生是國土中無飲食名純法喜食  
彼國土中無有餘乘純一大乘一切衆生決定大乘  
彼諸衆生無有毀禁及與威儀破正見者一切衆生  
決定佛法彼國無魔及與魔天外道尼乾諸異道等

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

不著諸見乃至不住著於善見一切衆生皆爲深行  
 空印所印彼諸衆生人天無別所受用物皆悉同等  
 是功德王光明如來壽十中劫多所利益多所安樂  
 利安天人多有無量菩薩眷屬皆不退轉是功德王  
 光明如來欲涅槃時授上精進菩薩記言是上精進  
 菩薩次於我後當得作佛號大莊嚴如來乃至佛世  
 尊於是劫中佛寶法寶僧寶不斷是故此劫名曰有  
 寶爾時大樹緊那羅王自聞受記歡喜踊躍得未曾  
 有以大菩薩善根神力欲令大衆發歡喜心增善根  
 故上升虛空高七多羅樹以佛神力及已言辯說是

偈言

實性普攝一切法	其性如空無垢穢
知於如是妙道已	是一切佛最長子
猶如夢中有所見	無實可見悉虛妄
知解諸法如夢已	是於諸行無疲厭
猶如幻化之所現	象馬車步等兵衆
第一義中無有實	此陰如幻無堅實
色之體性如水沫	諸受猶如水泡現
其想猶如熱時焰	諸行無實如芭蕉
三有心意及與識	如來說是如幻化

1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220

知陰性空無所有 於諸行中無疲勗

四大諸界如法界

諸入喻如空聚落

如是解知諸法已

能持諸佛空法藏

善自調伏於財施

以空淨戒自調伏

忍性常盡無有相

精進勝妙常寂滅

禪性寂靜無戲論

智亦空寂無戲論

若有能入如是法

是名爲度到彼岸

慈心無我無衆生

大悲清淨如虛空

大喜大捨悉空寂

是道梵道常最勝

是四所攝爲最勝

如來說是能普攝

此攝所攝永解脫

彼得攝法之彼岸

衆生無我無衆生

不得壽命及丈夫

六根常自寂靜相

能如是知名菩薩

無有菩薩無衆生

亦復不生無我慢

離二無著無戲論

是名無著實菩薩

諸法無實猶浮雲

無有來者無去者

其體常住法界性

善逝如如而覺了

諸法非有亦非無

以因緣故諸法有

如電暫現尋復滅

其心常樂如是觀

心行非色不可捉

世間如是同叵捉

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

若知心性本清淨

無有結使諸闇冥

說身如木如牆壁

癡無有主如瓦礫

能如是知本性已

更不作心依倚身

口說清淨猶如風

猶如山谷中響聲

知說音聲亦如是

於諸音聲不染欲

住在虛空不墮落

虛空無住亦無處

知於諸法如空已

如是衆生住於如

虛空本無生及燒

千萬億劫而不燒

知於諸法如虛空

彼至百千界離燒

須彌轉圍及諸山

大城邨邑及草木

能知是等如虛空

神通遠至千億界

地大水火及風大

四大猶之如虛空

能知此等皆平等

勇健乘空千億界

三界所有諸音聲

勝妙增上及中下

無量百千億劫說

不見本性知所在

彼勝無有別異相

雖知不能覺於心

心意等同入寂靜

諸如來等同於法

百千萬億同善根

本爲菩薩修行時

知菩提同一切法

彼得受記大名稱

諸法境界性自淨

如來境界無有量

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

如是知於平等已

持德如是得受記

今我無有色受陰

思想行陰亦如是

解知苦提得受記

不受陰記界入記

其所得忍本空寂

忍及與盡等無二

是無量名無生忍

如是則得於受記

無有能盡於無盡

盡問不起一切法

通達忍已得受記

無句入句無有相

實無有數無二邊

無有異作當作實

若如是者佛受記

今我性等一切法

已性無我等空性

菩提之性猶虛空

若能如是得受記

是名邪行非正行

若以心意而修行

平等法中行勝行

是等皆悉在地住

我今在上空中住

知住地者不同等

不著三界智轉增

是故得受無上記

爾時大樹緊那羅王說此偈已從虛空中下頂禮佛足合掌向佛如是白言世尊爲我已作佛事授我滿足無上道記世尊我於過世所修諸行則爲不空我爲不誑所作諸行爾時衆中有菩薩摩訶薩作是念言是大樹緊那羅王於何佛所初種善根彼佛如來

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

號字何等是時天冠菩薩知是菩薩心之所念白言  
 世尊是大樹緊那羅王於何佛所初種善根發菩提  
 心彼佛世尊號字何等爾時佛告天冠菩薩善男子  
 乃往過世無量無邊阿僧祇劫復過無量無邊阿僧  
 祇劫彼時有佛號曰寶聚如來應供正徧覺乃至佛  
 世尊是佛世界名淨莊嚴劫名淨潔是寶聚如來應  
 正徧覺其菩薩衆有六十億一切皆是無量精進得  
 塔羅尼不退無上正真之道其佛壽命六十億歲彼  
 國土中所受用物皆悉具足瑠璃所成如兜率天飲  
 食豐多土無餘乘純一大乘爾時有轉輪天王名尼

泥陀羅四域自在有四萬夫人千子具足勇健妙色  
 能伏他衆是時尼泥陀羅王請寶聚如來及菩薩僧  
 滿一億歲施諸所安衣服飲食牀敷醫藥一切樂具  
 作於如是無量供養供如來已成此善根及四萬夫  
 人并諸千子復有八萬四千衆生同發無上正真道  
 心發道心已復更滿於一億歲中以諸樂具恒常供  
 養寶聚如來過是後已捨於王位授最長子名曰淨  
 戒自捨國位彼佛法中剃除鬚髮以信出家如是千  
 子轉相禪位各各出家唯除最小王子名曰覺悲正  
 法治國不假兵仗善得自在統領國土善男子爾時

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

尼泯陀羅王及其諸子旣出家已寶聚如來初中及後所說淨法悉能受持善男子汝意云何謂異人乎勿有疑也彼轉輪王尼泯陀羅卽今大樹緊那羅王是其王諸子今皆修行於菩薩道善男子是大樹緊那羅王於彼寶聚如來法中初發無上菩提道心自是之後不離見佛聞法供僧教化衆生而不速疾取於無上正真之道我今授是無上道記當得作佛號功德王光明如來時天冠菩薩白言世尊未曾有也如來智慧不可思議乃能知於如是久遠佛言如是善男子如汝所言如來知見無量無邊何以故善男

子過去無量一切衆生如來悉能知彼諸心如是十方如是處處如是所作若善不善及無記業如是一切所有心轉如來悉知若現在起心若善不善若無記心如是十方如是處處如是所作如來悉知如來應正徧覺所有知見如是無礙若未來世一切衆生當起諸心如來悉知說是如來無礙智時三萬二千衆生本未發心今始殷重發阿耨多羅三藐三菩提心爾時大樹緊那羅王供養諸佛及諸菩薩聲聞大衆七夜已訖復更以諸所須樂具及其宮殿園林場地悉以奉施作如是言願佛世尊屈意數來憐愍我

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9

故當大安樂當大利益諸乾闥婆緊那羅摩睺羅伽爾時大樹緊那羅王子名無垢眼以寶珠網奉上如來白言世尊我緊那羅耽醉華香耽醉歌舞耽醉歡樂唯願世尊當爲是等說所入法門當令我等捨離狂醉修習菩提助道之法爾時世尊告緊那羅子無垢眼賢士自爾已去我當護汝令諸妓樂出六十四護助菩提妙法之音何等六十四所謂演出布施之聲戒聲忍聲進聲禪聲智慧之聲慈聲悲聲喜聲捨聲四攝法聲不忘無上菩提之聲不厭生死聲集善根聲佛聲法聲比丘僧聲念處聲正斷聲神足聲根

聲力聲覺聲道聲定聲慧聲無常聲苦聲無我聲寂聲無行聲靜聲無生聲無起聲如聲法性聲實際聲無我聲無衆生聲無命聲無丈夫聲無人聲無來聲無去聲無處聲無住聲空聲無相聲無願聲離聲滅聲無所有聲因緣聲無物聲無聚聲無依聲護正法聲降魔聲善方便聲教化衆生聲如幻如化如電水月夢響之聲法界叵壞聲如說如作聲集諸善根而不忘失無放逸聲如是賢士當令汝等諸樂音中出如是等六十四種護助菩提道法聲雷令汝等得不放逸滿助菩提法

1 2 3 4 5 6 7 8 9 20 1 2 3 4 5 6 7 8 9 20 1 2 3 4 5 6 7 8 9 20

大樹緊那羅王所問經卷第二

大樹緊那羅王所問經卷第二

大樹緊那羅王所問經卷第四

姚秦三藏法師鳩摩羅什譯

爾時一切大衆得未曾有合掌禮佛作如是言希有世尊如來乃能善護念諸菩薩摩訶薩以神通力而護持之佛言如是如汝所言如來護念於諸菩薩何以故護念諸菩薩即是護念一切衆生汝諸正士若佛如來護諸菩薩卽便爲護一切衆生何以故是菩薩爲一切衆生發大莊嚴發大莊嚴已令無量衆生離生死餓拔出安置令住正道諸正士是故汝等我涅槃後應當守護於諸菩薩若護菩薩當知則

1 2 3 4 5 6 7 8 9 20 1 2 3 4 5 6 7 8 9 20

經

大藏經卷三

護諸衆生已若菩薩施衣服飲食臥具病藥即是施與一切衆生若以樂具施與菩薩便爲已施諸衆生已何以故是諸菩薩出息入息常爲一切諸衆生故爾時欲界諸天色界諸天乾闥婆摩睺羅等及諸大衆聞佛所說深心隨喜以諸妙華珍寶瓔珞種種未香散如來上爾時大樹緊那羅王作是念言今者如來及諸菩薩大聲聞衆將欲還歸以我神力從此而住作大寶車令佛菩薩聲聞大衆乘之而去我及眷屬當共牽車則爲具足供養如來爾時大樹緊那羅王作是念已卽以大寶造作寶車高五由旬縱廣正

等亦五由旬衆寶間錯無量寶樹以爲莊嚴於此車上爲佛如來作師子座莊嚴校飾上高七仞敷置無量天諸寶衣一切菩薩及諸聲聞各爲設座其諸天子釋梵護世乾闥婆等爲聽法者悉爲設座爾時緊那羅王作大寶車及敷諸座已各合掌曰佛唯願世尊及諸大衆就寶車座憐愍我故爾時世尊及諸菩薩聲聞大衆一切餘衆悉坐寶車所敷座上爾時緊那羅王以佛神力及已神力以是寶車置右掌中上昇虛空高七多羅樹緊那羅王八千諸子及無量乾闥婆緊那羅摩睺羅伽各以金鎖牽挽寶車遊空而

1 2 3 4 5 6 7 8 9 20 1 2 3 4 5 6 7 8 9 20 1 2 3 4 5 6 7 8 9 20

經

方廣經卷之三

五

去八萬四千諸緊那羅作於八萬四千妓樂在如來  
前引道而去以諸偈頌並讚歎佛

足滿八萬及四千 是等緊那羅身形

清妙歌舞和衆樂

讚歎如來實功德

最勝相好有威德

最勝妙色衆所愛

常住清淨實功德

世尊有是大功德

於上虛空侍左右

無有能見如來頂

猶如大山堅不動

有如是身可樂德

遊空自在隨所至

導師有是大神力

猶如虛空淨無垢

世尊善斷脫結使

阿修羅等及羅刹

釋梵天王及淨居

日月星宿火珠光

毫相光明悉隱蔽

智慧力能如大海

發起衆生諸心行

三明普能照三界

頭頂敬禮世所敬

摧伏四魔諸結使

說四聖諦涅槃道

四神足力無所畏

如來行步最殊勝

詳徐進趣無傾動

常習調心住三昧

所說微妙悅世間

亦不依止是言說

言說柔軟善妙音

遠聞無量諸刹土

若有衆生聞是音

一切安樂生歡喜

經

方廣經卷之三

三

五七

1 2 3 4 5 6 7 8 9 20 1 2 3 4 5 6 7 8 9 20 1 2 3 4 5 6 7 8 9 20

經

方廣經卷第十三

五

三千世界諸海水 一毛孔中悉容受  
終不惱觸水衆生 其神通力無損減  
三千世界所有山 悉皆安置一毛孔  
往至無量千億界 然其身力無損減  
更於無量百千劫 勤苦無量調伏施  
善修學戒護諸根 忍辱精進禪慧力  
多供無量億諸佛 護持是諸佛所說  
其心終不生疲厭 大慈大悲利益世  
於無爲中不卑下 於有爲中不自高  
猶如大地不傾動 住世法中如蓮華

諦觀察了諸法空 都無有相猶水月  
如幻如化如水沫 亦如夢電熱焰相  
實性無我無有人 極淨無疑無有王  
猶如虛空淨無垢 一切有物如實性  
一切諸因及與緣 流轉造法無有王  
是能覺了菩提道 是故號之名爲佛  
是諸衆生獲大利 若見導師及問者  
彼終不畏墮惡道 是人常至於善道  
我等今得供上人 一切皆供我亦供  
以此廻向菩提心 願使一切如人尊

經

方廣經卷第十三

五

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

經

丁未年正月卷四

四

王

假令能量於虛空 能以毛滴盡海水

日月星宿墜虛空 無有能盡佛功德

爾時世尊乘於寶車遊空而去放金色光是光徧照於此三千大千世界王舍大城者闍崛山光照倍明時王舍大城阿闍世王及其夫人眷屬兵衆諸比丘比丘尼優婆塞優婆夷婆羅門居士見光瑞已持諸香華末香塗香幢幡寶蓋及諸妓樂出王舍城往迎如來既出城已詣耆闍崛山遙聞緊那羅王所作樂音微妙歌聲徧滿耆闍崛山之中爾時大樹緊那羅王以佛神力從於虛空下大寶車安著耆闍崛山之

中爾時世尊從寶車下詣自住處敷座而坐時諸菩薩大聲聞衆亦皆下車禮如來足次第而坐爾時阿闍世王及夫人婦女內外眷屬比丘比丘尼優婆塞優婆夷婆羅門居士各以所持諸供養具供養如來互跪合掌問訊世尊將無疲耶善安遊耶問訊已畢卻坐一面爾時天冠菩薩白佛言世尊是大樹緊那羅王及緊那羅衆幸如來車乘空來此得幾所福佛言善男子是大樹緊那羅王及餘眷屬發道心者從今已後當得五通乃至成佛從一佛土至一佛土不離見佛聞法供僧世世所生常識宿命得善好辯音

經

丁未年正月卷四

五

五七

1 2 3 4 5 6 7 8 9 2001 2 3 4 5 6 7 8 9 2012 3 4 5 6 7 8 9 2020

聲美妙亦不捨離教化衆生世世所生勤護正法勤化衆生爾時阿闍世王語大樹緊那羅王緊那羅王快得善利如來今者歎汝功德緊那羅王汝之功德我亦冀望同有少分時大樹緊那羅王語阿闍世王大王當知我所有功德悉施於汝及諸衆生何以故大王菩薩所有諸功德事悉與一切衆生共之何以故大王菩薩之法無所慳惜所有功德悉施衆生其心喜悅無執無悔大王當知菩薩以此功德廻向於一切智亦爲養育一切衆生何以故大王菩薩護念諸衆生故修行菩提爲衆生依大王汝今亦得獲大

善利得佛世尊文殊師利爲善知識親近聽聞不實無明黑闇翳障逆罪疑心熟惱除滅得大法眼得法眼故無有惱熟安隱而住是故大王當自剋厲成作法器若聞於法乃至一句不忘不失名護正法爾時天冠菩薩白言世尊菩薩成就幾法能爲法器是時佛告天冠菩薩善男子菩薩法器有三十二何等三十二佛所護持是菩提心器專心質直是無爲器增長志意是善根器修行於道是菩提根器正憶思念是多聞器慧是出道器進是集義器施是大富器戒是滿願器忍是三十二丈夫相器進是一切佛法之

1 2 3 4 5 6 7 8 9 2001 2 3 4 5 6 7 8 9 2012 3 4 5 6 7 8 9 2020

器禪是練心器慧是度障器大慈是等諸衆生器大悲是救拔貧窮器大喜是喜樂佛法器大捨是捨離愛恚器善知識是諸善根器修習多聞是般若波羅蜜器出家是離縛癡之器阿練若處是少事務無惱亂器樂於寂靜是諸禪定神通之器四攝法是化衆生器護持諸法是照明器陀羅尼是聞於一切未聞法器辯才是斷一切疑器念佛是得見諸佛器無惱害心是護一切善根之器空法是斷我見之器因緣是捨諸所珍器無生法忍是捨諸障礙受記器緣不退地是無畏器善男子是爲菩薩二十二法器說是

法時十千衆生發阿耨多羅三藐三菩提心而作是言世尊願使衆生得是法器亦令我等成此法器如佛所說爾時世尊告大樹緊那羅王善男子汝還所止汝諸眷屬或能憂悒緊那羅王白言世尊若其菩薩有憂悒者是則不名爲菩薩也何以故世尊能忍憂悒是名菩薩世尊云何菩薩有於憂悒云何菩薩無有憂悒佛告緊那羅王菩薩成就四法則有憂悒應當覺知何等四聞有無量無邊衆生心生驚畏聞受無量無邊生死心生驚畏聞佛如來無量智慧心生驚畏聞集無量福德莊嚴滿足相好心生驚畏緊

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

那羅王菩薩成就是四法者則生憂悒緊那羅王菩薩成就四法心無憂悒應當覺知何等四聞有無量無邊衆生我當安置於涅槃道而無憂悒聞無量生死而不驚畏修諸善根心無憂悒聞佛如來無量智已我當成滿如是大智而無憂悒聞集無量福德莊嚴成滿相好而無憂悒是爲四緊那羅王菩薩復成就四法則有憂悒應當覺知何等四時時欲證於聲聞乘時時欲證於緣覺乘法欲滅時捨不護持不勸他人令住菩提是爲四緊那羅王菩薩復有四法無有憂悒應當覺知何等四有逼切苦不捨菩提心不

生聲聞緣覺之心寧捨身命不捨正法乃至百由旬外勸人令發菩提之心是爲四緊那羅王菩薩復成就四法則有憂悒應當覺知何等四見來乞者生瞋呵叱自樂安臥不修多聞若已聞法不爲衆說是爲四緊那羅王菩薩復成四法無有憂悒應當覺知何等四見乞者已生善知識想無侵害心不樂自樂常欲樂人修習多聞無有厭足所聞持法於大衆中廣爲人說不期利養是爲四緊那羅王菩薩復成就四法則有憂悒應當覺知何等四不集波羅蜜道不修攝法不勤精進教化衆生於少功德自生知足不修

1 2 3 4 5 6 7 8 9 20 1 2 3 4 5 6 7 8 9 20

菩薩無量功德是爲四緊那羅王菩薩復成就四法則無憂悒應當覺知何等四常勤精進修諸波羅蜜如救頭然常勤精進集四攝法常勤精進教化衆生精進勤修滿諸功德修習菩薩無量功德是爲四爾時世尊說是四法以遣大樹緊那羅王告阿闍世王大王汝今聞說菩薩如是四句無憂法不阿闍世王卽白佛言聞已世尊是故大王若諸菩薩行菩提者不應憂悒阿闍世王白言世尊云何菩薩修菩提行爾時世尊爲欲成滿緊那羅乾闥婆摩睺羅伽等諸樂音中所出法音又欲報答阿闍世王所問菩薩修

菩提行而說偈頌以顯其義

- |         |         |
|---------|---------|
| 若欲修行利益行 | 聞於法行如說行 |
| 修行菩提最勝行 | 行彼修時無憂悒 |
| 修安樂行爲衆生 | 諸衆生中等行慈 |
| 修行菩提最勝行 | 彼無若干雜種行 |
| 爲諸衆生修堅行 | 志意清淨修行者 |
| 修行菩提最勝行 | 彼行終不墮惡道 |
| 修於布施放捨行 | 行於一切悉捨行 |
| 修行菩提最勝行 | 彼人無有慳惜行 |
| 修行淨戒寂淨行 | 身口清淨無垢行 |

1 2 3 4 5 6 7 8 9 201 2 3 4 5 6 7 8 9 201 2 3 4 5 6 7 8 9 201

- |         |         |
|---------|---------|
| 修行菩提最勝行 | 彼終無有毀禁行 |
| 修於忍辱利益行 | 離於瞋恚過咎行 |
| 修於菩提最勝行 | 彼無嗔恚過咎行 |
| 修持精進力住行 | 於生死中無厭行 |
| 修於菩提最勝行 | 彼終無有懈怠行 |
| 修於禪定三昧行 | 身心獨寂無鬧行 |
| 修行菩提最勝行 | 彼終無有憒鬧行 |
| 修於智慧菩提行 | 一切法行亦如是 |
| 修行菩提最勝行 | 彼終無有不智行 |
| 修持慈心利益行 | 於諸衆生勝悲行 |

1 2 3 4 5 6 7 8 9 20 1 2 3 4 5 6 7 8 9 20 1 2 3 4 5 6 7 8 9 20

- |         |         |
|---------|---------|
| 修行菩提最勝行 | 彼有最上勝寶行 |
| 修於法行及空行 | 教化一切衆生行 |
| 修行菩提最勝行 | 彼終無有止住行 |
| 修於因行果報行 | 斷於一切有邊行 |
| 修行菩提最勝行 | 彼終無有染著行 |
| 修於淨行無垢行 | 解脫一切結使行 |
| 修行菩提最勝行 | 彼終無有惱熱行 |
| 修於安隱解脫行 | 施諸衆生無畏行 |
| 修行菩提最勝行 | 彼有一切滿願行 |
| 修於日行及月行 | 猶如蓮華無汙行 |
| 修行菩提最勝行 | 彼爲人天所敬禮 |
| 修於釋行梵王行 | 爲滿白法之妙行 |
| 修行菩提最勝行 | 彼令魔軍怖畏行 |
| 修於上行及勝行 | 斷於貪欲瞋恚行 |
| 修行菩提最勝行 | 彼終無有瞋癡行 |
| 修於外道禁戒行 | 慧眼清淨之妙行 |
| 修行菩提最勝行 | 彼終無有妄想行 |
| 修於調伏寂靜行 | 無有名色狂亂行 |
| 修行菩提最勝行 | 彼爲人天所敬禮 |
| 修於易行利益行 | 斷於左道勝妙行 |

1 2 3 4 5 6 7 8 9 200 1 2 3 4 5 6 7 8 9 201 2 3 4 5 6 7 8 9 202

修行菩提最勝行 彼人常有智慧行

修於健行勤進行 能怖魔軍勇猛行

修行菩提最勝行 彼於道場無不知

修顯露行無屏行 得於陀羅尼妙行

修行菩提最勝行 彼有不失果報行

修於正行寂靜行 常一切時出家行

修行菩提最勝行 彼有如說修行行

修於長者及勝行 行於世間無勝行

修行菩提最勝行 彼終無有不智行

修於方便相應行 捨於禪樂微妙行

修行菩提最勝行 彼終無有惱熱行

修於世行離世行 欲界色界無色行

修行菩提最勝行 彼終無有恐怖行

修於遍行一切行 滿足諸根善妙行

修行菩提最勝行 彼智猶若如虛空

說是菩薩諸行法時五百菩薩得無生法忍阿闍世王及其眷屬王舍城中婆羅門居士及緊那羅眷屬之中八千衆生發阿耨多羅三藐三菩提心已白言世尊我等當於如上所說菩薩所行菩提諸行如說修行爾時世尊語大樹緊那羅王汝今可去還其所

1 2 3 4 5 6 7 8 9 20 1 2 3 4 5 6 7 8 9 20

止爾時大樹緊那羅王及其夫人并諸子息一切眷屬頂禮佛足右遶三匝悔過世尊作諸妓樂天雨衆華放大光明地六種動即便還往詣香山中爾時釋提桓因白言世尊是大樹緊那羅王乃能如是真實供佛真實供法佛言僧行迦不不但於汝名爲真實普勝三千大千世界所有釋梵護世大王聲聞緣覺是緊那羅王真實殊勝何以故天王菩薩發心已勝一切聲聞緣覺僧行無有能勝於菩薩者唯除如來何以故從於菩薩出生如來從於如來出生一切聲聞緣覺爾時釋提桓因於如來所聞是語已涕泣流

淚作如是言我今永爲離於大乘爾時瞿夷天子語釋提桓因父王天王如是如是一切諸行一切諸法無有覆障從妄想起不能發生無上正真大道之心不能悲念一切衆生不能修於大慈之心父王天王今復何言已入正位燒敗種子於此大乘永非其器瞿夷天子說是語時三十三天中五百天子皆發無上正真道心爾時瞿夷天子白言世尊我親現見菩薩所行百千萬億難行苦行乃至然燈佛所得無生忍願佛少說我等聞已如說修行當得是法爾時世尊告瞿夷天子無有菩薩不種善根得無生忍菩薩

1 2 3 4 5 6 7 8 9 20 1 2 3 4 5 6 7 8 9 20

多種無量善根然後乃得無生法忍瞿夷天子菩薩  
 成就是四法者得無生法忍何等四諸佛平等諸法  
 平等世界平等衆生平等瞿夷是爲菩薩成就四法  
 得無生法忍復成四法何等四翫樂四空翫樂大悲  
 三解脫門翫樂方便六波羅蜜翫樂禪定及五神通  
 是爲四復成四法何等四解知陰性即是菩提知諸  
 界性集於菩提信菩提性即是界性知諸入性集於  
 菩提以菩提性觀於諸入一切諸法集於菩提菩提  
 之性卽諸法性定無有疑是爲四復成四法何等四  
 知一切法住於實際不動搖故知一切法住於如中

信三世法等不壞性故觀諸法平等如虛空性故瞿  
 夷是爲菩薩成就四法得無生法忍說是法時五百  
 菩薩得無生法忍瞿夷天子得於順忍爾時世尊將  
 欲封印此經法故告大德阿難阿難汝受持此經名  
 曰大樹緊那羅王入作一切法門行經大德阿難白  
 言世尊我已受持未曾有也世尊是經極爲甚深微  
 妙決其義定文辭莊嚴世尊無有餘經能勝此經今  
 此經中無不開示者世尊於我目前得法光明不如  
 此經我今自覺於是經中獲得百千萬億功德世尊  
 我今以此有限量智入聲聞位聞此經已尙得如是

1 2 3 4 5 6 7 8 9 20 1 2 3 4 5 6 7 8 9 20

大法光明況復菩薩摩訶薩成就無量大海法器無畏大智修集諸法爲諸衆生作不請友無量大智聞如是法得幾法門佛言阿難若是三千大千世界一切所有日月光明是菩薩等所得法明一毛孔光悉能隱蔽是諸日月所有光明阿難若佛如來一切毛孔悉放光明是諸光明悉有智慧何以故諸所有明皆智慧故阿難如來有此智慧光明如來以此智慧光明能知一切衆生心行若有衆生聞此經者皆當得是大慧明照若書寫受持讀誦通利於大衆中廣爲人說正念思惟如說修行是人終不離菩提心教

化衆生大悲莊嚴著大慈鎧爲降衆魔阿難當知如是之人定趣道場爾時阿難白言世尊以佛力故令我已受持此經法世尊若有善男子善女人受持此經讀誦書寫於大衆中廣爲人說得幾功德佛言阿難若有菩薩善男子善女人於日初分以滿三千大千世界所有七寶施須陀洹斯陀含阿那含阿羅漢及諸緣覺乃至諸佛如是日中日沒初中後夜如上布施滿於千歲阿難汝意云何是善男子善女人所得功德寧爲多不甚多世尊甚多善逝世尊若於一日所得功德無量無邊況復千歲佛言阿難我今唱

1 2 3 4 5 6 7 8 9 20 1 2 3 4 5 6 7 8 9 20

令是善男子善女人爲得菩提爲化衆生爲轉法輪受持是經讀誦書寫於大衆中廣說顯示其福爲勝何況復能如說修行阿難若於是經受持乃至一四句偈在大衆中廣爲人說其福爲勝何以故如是之施名爲法施諸施中最如是之施即是法施是爲捨謂捨於法是名上受謂受於法是名上持謂持於法何以故阿難施於法已能滅結使財寶施已增長煩惱是故菩薩爲滅結使當行法施佛所印可如是法施則能攝取一切功德阿難菩薩法施有三十二功德名稱何等三十二有正憶念有於智慧有於進

趣有離慳結有少婬欲有少瞋恚有少愚癡降伏自他所有結使多人所愛諸天讚歎諸龍夜叉乾闥婆等常隨守護不空受用人之供養衣服飲食臥具醫藥不求而得名稱遠聞十方世界諸惡鬼等不得其便諸佛世尊之所歡譽守護正法持佛法藏不墮一切諸惡道中生於人天不以爲難不離見佛不離聞法不離供僧得識宿命生淨佛土生生之處諸根具足得三十二相莊嚴之身爲上王幢陀羅尼根本種子作無斷辯智因得智人眷屬集大智因速疾得法不起不正憶念之心捨離一切世間財施得大法藏

1 2 3 4 5 6 7 8 9 20 1 2 3 4 5 6 7 8 9 20

辯才無盡阿難菩薩法施有是三十二功德名稱爾時釋提桓因白佛言世尊我等亦當受持此經世尊如來涅槃後有法器衆生我要當令得聞此經令其信解我當守護何以故世尊我等欲得如上功德爾時世尊讚釋提桓因善哉善哉天王汝今乃能勤守護法作師子吼天王汝今以此護法善根隨我法在阿修羅衆悉當降伏諸天得勝何以故橋尸迦得見如是無畏法故謂於諸法無所染著天王諸所有畏皆由住著於我見故天王若無所著是護正法爾時娑婆世界王大梵天王白言世尊我亦當捨無量禪

樂詣諸城邑聚落郡縣流通此法我亦往至彼聽法令說法者是堅念力何以故從是法中出生無量聲聞緣覺釋梵護世爾時四天大王白佛言世尊我等四王是佛聲聞當堅守護於是經法令得久住我諸眷屬若有不信佛此法者摧伏令信於佛法中勤加精進親附愛樂世尊若有天龍夜叉乾闥婆阿修羅迦樓羅緊那羅摩睺羅伽等有惡心者若欲降伏當誦此呪所謂

多羅單一伊單二伊那單三婆羅單四呼妻五摩訶呼妻六呼妻呼妻七伊娑嚩八毘湊嚩九波離車陀

1 2 3 4 5 6 7 8 9 20 1 2 3 4 5 6 7 8 9 20

尼斯那泥十波迦奢泥十希持希持十生毘持十阿  
車十  
多車十摩羅伊祇泥伽喉六薩婆波波提那七  
薩婆彌利車波也咲多那八十阿那憂多羅薩婆復多  
那羅陀跋尼多十九

四天大王所見呪句是呪神力諸欲求短悉能降伏  
爾時世尊告彌勒菩薩天冠菩薩諸善丈夫我今以  
此無量千萬阿僧祇劫所集難得阿耨多羅三藐三  
菩提法囑付汝等令得久住中不斷滅時彌勒菩薩  
天冠菩薩白言世尊我等於佛般涅槃後當廣流布  
於此經法諸有厚種善根菩薩諸衆生等令至其手  
使得自在降伏憍慢能持是經令信欲解佛涅槃後  
若有得聞是經法者受持讀誦書寫解說當知皆是  
彌勒菩薩天冠菩薩神力所持爾時魔王波旬來至  
會中白言世尊若爲聲聞所說諸法我於是中無一  
毛豎今者世尊演說如是菩薩道法菩薩印印如來  
護持菩薩護持一切衆生之所歸趣處說如是法我  
今已爲憂箭所中我今自知便爲生老願佛世尊執  
持我手更莫演說如是極大功德力經勿令我等重  
被憂箭佛告波旬汝勿愁苦多有衆生在汝境界不  
信是經少有衆生能信受者波旬當知如彼大地抓

1 2 3 4 5 6 7 8 9 20 1 2 3 4 5 6 7 8 9 20

取少土信甚深法諸衆生等如是甚少如餘大地其  
 不信者如是多矣波旬其不信者盡是汝許是故波  
 叔應生歡喜波旬衆生之界無量無邊說是法時無  
 量衆生住於無上正真道心九萬二千菩薩得無生  
 法忍入萬四千衆生遠離塵垢得法眼淨八千比丘  
 盡於諸漏心得解脫時此三千大千世界六種震動  
 大光普照天雨衆華百千妙樂不鼓自鳴百千萬億  
 那由他天歡喜踊躍稱讚歎我等今於闇浮提中  
 再見法輪轉世尊昔在波羅柰國轉正法輪所利衆  
 生今說是經所利衆生是爲殊勝其有衆生持是經  
 皆大歡喜

者是人不久當轉法輪爾時彌勒菩薩天冠菩薩大  
 德阿難等白言世尊當何名此經云何受持佛言善  
 男子是經名爲大樹緊那羅王所問亦名宣說不思  
 議法品如是受持佛說是經已彌勒菩薩天冠菩薩  
 大德阿難等一切大衆天龍夜叉乾闔婆聞佛所說  
 大樹緊那羅王所問經卷第四

音釋卷一

濡濡同

詰咨同訪

疊上發聲

下蒙

卷二

趺孚也

吒聚也

杻鉤同長

械上丑下解

1 2 3 4 5 6 7 8 9 20 1 2 3 4 5 6 7 8 9 20 1 2 3 4 5 6 7 8 9 20

柱桔  
也

卷三

乾闥婆

梵語也此云香陰

咤羅尼

梵語也此云總持謂持善不失

叱

入聲也

醺燕合  
飲也

持惡不

生也

卷四

婆娑去

云香陰

燒擾亂

安撫不

悒

區

淒

苦也

波瀾去

云香陰

礫石也

力小

咤羅尼

梵語也此云總持謂持善不失

抓

爪爬也

當湖馮洪業募貲續鑄  
法藏方冊頤周法界緇白四衆咸滿  
如來四弘誓海妙嚴性德究竟圓覺頤多生父  
母咸被資薰證入法流誕登覺岸俾業乘願  
入死出生不迷本性具足正知又願  
藏教遐訖聲光縣紗見聞成種依正互融民風  
還淳永無災難